


南溪縣志  
卷八



南溪縣志卷之八

藝文志下

雜著

起原趙公墓表

林中麟

南溪起原趙公爲余雍正己酉選貢同年友也是時宋雅伯夫子衡鑒精明所拔皆知名士然侈然自負者居多而公獨安重自持無欣喜色余時已心重其爲人乾隆壬寅歲其子藝開已食餼來從余遊余詢公起居云於前癸未謝世迄今已廿載矣因泣以狀請表其墓按

南溪縣志

卷八

藝文雜著

一

狀公諱登喬起原其字別號縈水世爲南溪人尊人子先公邑增生學行素優妣陳太孺人公少穎悟讀古人書能得其精義凡所以修己治人之方俱一一探其底蘊可見諸實行不徒以詞章爲能雍正元年補博士弟子員四年食餼六年選拔亦可知其才具之不凡矣乃同選拔諸人赴北得州縣十數人有歷至大員者而公以兩尊人故不敢離膝下竟不赴日以承顏順志爲事課兩弟登階登雲登階早卒遺一子公撫之如子登雲年十五入膠庠亦卒公深痛之恐老人不勝悲百計安

慰以娛暮景無何尊人子先公年六十有五壽終公幾不欲生念陳太孺人在高堂忍延殘喘泊丁丑歲部選營山教諭公曰吾母年逾古稀又多疾難以迎養吾忍以微名易母子至性耶卽辭不就越七年癸未公卒後又五年陳太孺人八十有三乃卒公生於康熙甲申得年六十配余孺人犍爲孝廉輝祖公次女有賢德先未舉子爲公置丁副室生子元開後余孺人生子藝開瀛開俱能承公志公之行己如此夫世之急急於功名者眾矣身無可進之階尙多方圖維以希一試顯擢業已

在望孰肯甘心草茅乃公始不赴北臨選亦不就職諄諄以親爲念其純孝爲何如迴憶當年在戎城選貢時公舉止異乎尋常益歎至性人其風度早不羣也公芳踪不勝枚舉姑撮其大者以表公之墓

明經包樂山墓表

慶符知縣

王崇本

進士

包氏於閩之上枕爲著姓自明經之祖國棟遊學於蜀始家南溪明經之考鴻孝友有隱德至明經遂占士籍明經爲鴻第四子諱學崧字樂山幼穎雋讀書異常兒弱冠通帖括補邑博士弟子員旋食餼試輒高等然屢

躋於省闈以明經終居恒教授里中以啟行力學相切  
正其諸子皆親督課之多所成就奉親以脩羊所入曲  
盡菽水歡母氏羅暮年得風疾起居飲食非扶掖不可  
明經侍惟謹持被臥榻旁夜常數起必諦視安寢乃退  
衣不解帶者再寒暑蟣蝨滿身不自覺也執喪毀瘠盡  
禮間左多稱之與入恂恂和易遇是非明決嶽嶽然不  
少阿附嘉慶元年

詔徵孝廉方正之士邑令翁霏霖嘗謂人曰如明經包學崧  
者斯其人耳將舉之會以事去不果明經娶王氏有婦

德子五人長宗縣學生次字嘉慶戊午科舉人次密次  
實次憲並諸生明經生於乾隆丙寅二月卒於嘉慶丙  
寅三月年六十有一其明年葬於江安縣之陽春壩未  
葬幽之石越六年其子字因余同鄉吳君之鈇丐余爲  
文表其墓吳僑寓南溪久曾親見明經爲余道其如此  
余惟孔門論士以宗族稱孝鄉黨稱弟爲次選孝弟人  
之本也士不此之務而徒飾章繪句以倖獲於一時本  
之不立其他又可問乎嗟乎此俗學之所以口敝也常  
據華陽國志載棘道隗相吳順事母孝有橫石生江赤

烏巢庭之應南溪故棘道縣地風俗之厚所由來遠逮  
晉以降罕有傳者豈遂無其人歟抑有之而湮沒不稱  
歟若明經者庶幾近之矣志又稱隗相舉孝廉爲郎吳  
順舉孝廉官至太守明經雖有知者不果薦也其亦有  
幸有不幸耶然隗相吳順以孝傳不以舉孝廉傳也士  
患無其實耳有其實而絀於名何害天之報施善人不  
於其身於其子孫明經善事父母克訓其嗣人使其嗣  
人益勉於善能世有其孝弟將所以大其緒者又豈可  
量哉余旣重吳請因爲敘其崖略揭諸阡俾有聞於後

南溪縣志

卷八

藝文雜著

四

且以爲其嗣人勗焉

題南溪烈婦祠壁

四川學使

吳省欽 白華

甚矣志地者之不可不審也符有先絡棘道有張帛絡  
以殉父死沉帛黃氏女以殉夫張貞沉沉十四日持夫  
手出於灘下常璩志甚明白酈道元以先爲光以貞爲  
員范蔚宗烈女傳傳絡事而不及帛又誤以絡爲叔先  
雄因遍考搜神記太平御覽困學紀聞辨其同異棘道  
爲今南溪宜賓二縣地敘州府志於宜賓烈女言唐張  
貞乘舟覆沒妻黃帛氏求屍自沉於南溪鴛鴦圻則云

漢張貞妻黃帛沉此四川通志漢張正船覆屍不得妻黃氏自沉江積四十日持正手出員真正形聲遞訛甚至誤漢爲唐考異苑華陽國志太平御覽皆作正且十四日而非四十日予維貞之名誤帛之心不安非爲張帛黃帛之可互稱也帛祠在南溪縣治前歲久圯葺因倡以私錢而縣令無錫祝君頌成之書之壁以稔來者六月十九日祈雨紀夢

翁紹海

余不喜扶乩之戲爲其近於誣也康熙年間錢塘宋公名鑑以歲進士令南溪有惠政相傳歿而爲城隍邑人

扶乩者輒應巫國學嘗爲予道之六月十九日祈雨余步禱入廟門見橫懸一額題曰捍禦聲靈有赫旁署西泠宋鑑題余爲之憬然行禮時因默祝曰民心所歸卽神靈攸寄公之德政堪保障斯土故民以城隍尊公余故占籍錢塘學與公有桑梓誼有香火情今縣境缺雨人心皇皇如公有靈卽沛甘霖以昭響應余當爲公登諸紀載永示來茲也是夜炎熱異常四更纔合睫夢一老者向余吟云客裏無花春寂寂夢中見雪鬢絲絲正欲聆其下聯爲風雨驚醒已而瓦溝潺潺達旦不止噫

是果公之靈應歟何其速也是不可不紀

雷孝子贊

前人

祝融不仁玉石等視雷子殉親年十三耳骨肉同燼父骸子負

帝用汝嘉旌前式後桂輪峩峩熨溪泚泚於萬斯年嗚呼孝子

曉諭各節婦後裔示

前人

爲曉諭事照得本縣署前舊建烈女祠供設烈女黃帛牌位載在祀典歷有年所理應潔淨嚴肅以昭誠敬嗣

南溪縣志

卷八

藝文雜著

六

因縣治向未建造節孝祠所有自明迄今各節婦栗主祔入烈女祠神龕原屬一時從權之舉並非一定之規也查道光十四年城內桂花街業已捐建節孝專祠則各節婦栗主自應祔入節孝祠內俾春秋二祭得邀祀典豈可遺漏舛錯攙雜不清致違

國家啟崇風化之道本縣前詣烈女祠行香查看栗主十一位或前明

國朝年代不清或不載節婦之夫名殊失女子從夫之義並有栗主跌坐脫落不全欹斜顛倒者有與節孝祠栗

主重複者有節孝祠漏未祔送者更有並非節婦栗主濫列神龕者日擊情形殊堪憫惻本縣念諸節婦生前茹荼飲藥立伉儷之綱常歿後建表旌閭沐哀榮之

盛典乃憑依所在典禮蕩然諒靈魄定有不安爾子孫豈能膜視茲本縣擇期修葺烈女祠清釐各節婦栗主其年代不清不載節婦之夫名者查明縣志增改節孝祠栗主重複者漏未祔送者飭里差鄉約查傳各節婦後裔將重複者迎回宗祠或埋墓上漏未祔送者於七月初十日前赴縣具稟協同齋長及節孝祠首事送入祠內

本非節婦栗主濫列神龕者里差鄉約查明如無後裔及本宗支派將其木主於孟蘭會道場完畢日焚化庶烈女供設神龕不至亂雜無章而各節婦栗主亦不至茫無歸宿爲此出示曉諭爾節孝後裔人等知悉爾等務於七月初十日前赴烈女祠認明遵照辦理如屆期不到本縣卽飭齋長禮房將重複者送孟蘭會道場焚化漏未祔送者於秋祭前五日送入祠內供設在本縣職司風化固屬分所應爲但爾等乃節婦後人水源本本置身事外南溪風俗醅良應不至此本縣爲培植倫

常尊崇節孝起見故不憚言之諄諄其各凜遵特示

本邑紳士請 旌雷孝子公呈

訪得縣屬李庄鎮於乾隆二十六年二月十八日火見  
烏流雲驚鳥集災生直突害及比鄰有孝子雷大者年  
甫十三同其父名曰仁者在鎮貿易維時父以疴負採  
薪病沉伏枕孝子瑩瑩子立內少雁行慘慘劬勞獨申  
烏養忽驚社鳥之呼深懼池魚之及無如親恩甚重子  
力彌孱有人呼之使出初擬竊負而逃無父不肯獨生  
何忍絕裾而去迨至鬱攸既息玉石俱焚然猶負父在

背伏屍於門如重累人識金剛之不壞登極樂界雖玉  
碎而猶全有里人張瑤者捐置雙櫬俱付一坏當其焚  
身不計心已同於死灰迨至爛額相依骨並歸於淨土  
幽潛未發事已七十餘年表闡維殷訪之二三遺老重  
尋窟宅已朽灰釘述往跡於劫後焚餘事雖載之邑乘  
念前徽於年湮代遠旌未表其里閭伏懇仁恩體  
聖人孝治之心取童子殉親之烈俯從輿論上達

宸聰置韓陵之石典特予以建坊等縣上之田字特書其旌  
善庶幾骨化烟銷精誠不泯傾風慕德興感皆同至若

肇建烏頭生等願捐麟趾但冀發幽光於下里無煩頒  
法帑於

上方所有顛恩旌孝並捐資建坊謹連名稟乞

南溪學教諭鞠汝欽訓導左紉蘭看語

孝子雷大髻年啜菽貧比仲由曲突積薪禍生回祿譖  
出之聲不戒鬱攸之燄方張殊虞帝之捐階類宋姬之  
待姆火已延燒及屋監亦有光父猶偃息在牀負之無  
力百身莫贖嗟玉石之俱焚九死何辭悼烟塵之已燼  
誰復延爲上客悲哉爛額焦頭未遑擬作仁人倏爾赴  
湯蹈火詎童心之未化原孝德之維昭金石將渝門閭  
未式縱莫喫欒巴之酒一但反風還應封介子之山千  
秋寒食旣志乘之可徵宜

旌揚之下逮

南溪縣知縣翁紹海看語

孝子雷大年剛舞勺父負採薪邑人不戒忽聞譖出之  
呼童子何知猝遇鬱攸之禍向使臨難而避人亦恕螳  
臂之孱疇則忘身以殉焚不顧象齒之慘乃赤子專誠  
如火益熱蒼天不諒匪父靡瞻負之趨也無力出於戶

而不能竟致爛額焦頭同燼一家骨肉不料垂髻束髮  
能立千古綱常迄今七十載幽光潛德未賁

絲綸凡在百二十里白叟黃童何由興感是用

恩垂綽楔表厥里閭昭茲來許傳芳踵南董之編靡所與同

媲美問曹江之水欽茲孝烈理合

旌揚

奎峰書院策問

翁紹海

問知縣爲親民之官親民莫先於教養教養二者養民  
尤先南溪枕山濱江地非沃壤百姓能自贍者什之七

南溪縣志

卷八

藝文雜著

十

難自贍者十之三其中老病孤貧雖設有新舊兩養濟  
院予蒞任後復又酌定條款按給口糧而城鄉總未能  
徧及檢閱讞牘每有恃老倚貧滋生事端者况此無衣  
無食之壯丁無父無母之幼稚欲其無恒產而有恒心  
也得乎夫政在養民不若使民有以自養縣屬自農工  
商賈以及受雇駕船拉炭外無可自食其力者將何道  
而使之計直餬口不流於宵小乎予聞黔蜀土壤毗連  
地氣相類黔省產有土綢係蠶食青桐樹葉作繭而成  
者南溪荒山頗多青桐不少倘倣黔省育蠶之法往黔

購蠶種蓄放則養蛹之時逐鳥者需人成繭以後絡絲者需人查逐鳥絡絲之役在春夏秋三季冬則甘蔗花生處處成熟此等孱弱之幼稚能否藉此以資生歟又查南溪炭峒拉土拉炭土著甚少而峒主則皆本邑人揆諸一視同仁之義原不必過分畛域第事有緩急遠近斷難枵腹而飽鄉鄰予以爲嗣後炭峒雇工惟本縣有住址保人者始准雇用非南溪者不得入炭峒各設號簿以便稽查庶外縣之盜賊既不能以炭峒爲逋逃藪而峒內多一服苦之壯丁卽縣境少一無業之匪類

此其於地利時宜合乎否乎縣有常平倉監倉濟倉社倉所以救養民之政之窮者也南溪常監加貯額貯穀四萬石濟倉額貯穀三千石社倉額貯穀二萬四千石有零遇有歉歲及青黃不接之時常平監濟事隸在官辦理周折惟出借社穀間有奉行然願借未必許借許借者未必願借於不願借者而強之借則有抑勒之嫌於願借者而徇之借則有拖欠之慮查例載社穀出借春借穀一石秋加息穀一斗還倉計利非不甚輕但借穀之時籩米養家者半賣銀救急者亦半其加息還倉

也民欠有之蝕耗有之包戶約長挪移侵吞又有之當事者苟諱疾忌醫偷安時日遲之又久必至虧蝕而不可救如今歲之社穀大費周章爾諸生所共知者果何道之從而能出借不嫌抑勒還倉不慮拖欠閭閻食社穀之惠經管無賠累之虞有良法歟三代以下得井田之遺意者莫如保甲保甲之法行而救災拯患除暴懲奸統視諸此固也在南溪有難焉者保甲必嚴鄰佑之罰其聚居城市鄉場無論矣小民耕種營生或買或佃人隨地徙如皆責其寫耕則鋤犁餉饁遼遠不便如各

任其居耕則或隔一二里或隔三四里有住四五家者有住二三家者甚有止住一家者此中倘有不法情事遠鄰不能苛以徇隱之條卽有盜賊竊發亦不能望其救護之速將古人相助相友之美意不幾於廢耶保甲又必嚴約長之選查鄉約客長舉報匪人是其專責在身家殷實者經理產業畏招怨尤匪惟不暇亦不敢承大抵充此任者卽非好事之莠民度非有產之富民可知也有舉報而官不信任焉則約長無權而惡胆愈肆有舉報而信任焉則扶強抑弱縱富欺貧賄賂報復無

所不至是無約長而保甲不行用約長而保甲愈壞予束髮讀書知養民之政兼籌衛民者莫如管夷吾王陽明成法下車卽捐廉辦理保甲務使事有實濟不許陽奉陰違第恐古方不醫今病南轅不合北轍語云立一法卽生一弊甚至法去而弊存南溪三萬戶中何以使保甲之行法立而弊不生歟若夫衛民之道不一端事莫急於緝捕予閱報竊呈詞必書速辦二字本日批牌並送發差急緝庶幾賊不違颺贓未消化數月以來盜風終未盡熄何也蓋盜之土著者易緝盜之異地者難

緝盜之登岸者易緝盜之乘舟者難緝南溪毗連五縣面臨大江往往獲賊破案其贓物賊夥分住鄰邑本縣每據供移關輒以並無其人移覆將柰何又有豬牛被盜莫不跟踪追捕及至江邊滅迹南北東西茫然莫辨緝捕雖嚴望洋空返將柰何是則撤窩篷塞岩峒僅能搜本地之賊不能禁外來之賊講團練坐路口僅能擒登岸之賊不能防乘舟之賊也縣屬水卡共二十處予親歷其境揆度地勢增裁歸併共十九處境內小船設立船頭皆編號排連不准夜放又添設巡船星夜上下

梭巡防備異地登舟之賊慮不可謂不周然而事煩則費多時久則法弛果何道之從而能煩而不費久而不弛歟予視事南溪逾半載矣夙興夜寐兢兢以教養自勵而鞫問之下見夫析錙銖而兄弟傷殘畏飢寒而夫妻拋棄甚至父子爭分爨之財翁壻結粧奩之訟慨風俗之澆薄皆長吏之羞慙然而既富者方穀激濁乃揚清茲舉樹藝社倉保甲緝捕四條姑後教而先養爲急則治表之計司馬德操云時識務者是在俊傑爾諸生服疇食德於茲有年利弊諒所洞澈其愷切指陳以資

採擇此四條之外更有何利當興何弊當革或興利而未能盡興革弊而未能盡革不尙文詞不嫌瑣屑毋泛毋隱毋諛毋訐各詳著於篇以匡予之不逮是所厚望焉

包芥舟公家傳後序

高友歐

國朝文教昌明人材輩出甲乙兩科外選拔朝考教習諸大典以廣羅俊秀一才一藝之士靡不登選

今上御極之元年屢發明詔命薦舉孝廉方正著直省督撫各飭所屬悉心採訪務得操履純潔才猷傑出物望允孚可備任使者毋視爲具文以失拔滯選幽之義於戲

何其盛矣三年公以才品兼優奉

旨入都赴考召用歿於湖北荆門沙陽鎮六年制憲戴學政  
潘兩公疏奏公持躬孝友慷慨好施鑿邑險灘入祀鄉  
賢祠歐讀公家傳未嘗不反覆嘆慕以景仰其行事然  
尙恨所載疎畧有未能詳密者邑西筭箕灘皆卵石水  
落積露江心磊然彌望歲久泥沙層疊灘口淺狹湔湍  
益駛滂流者石磨舟格格有聲不得泝公鑄鐵爪二十  
每重五鈞鋤沙石中連環小舟繫其柄熾槿油炒鐵子  
數十斛傾爪處放舟排流而下選有力善使水者奮勇

搖櫓水勢迅疾爪掄石移鐵子墜入罅隙濁淖不復凝  
結沙石潰澗自相衝擊而崩摧焉餘年閱者決定者深  
隘者濶矣銅鼓子在邑東明按察錢公經此舟覆見  
神救護建于公祠於上廟前亂石崩劣灘甚險惡有圓  
石踞水中夏漲盤渦洄漩波濤澎湃大聲鞀鞀若銅鼓  
昔人因名之其石堅不可破公盛油漬麻烈炬於上光  
焰燭天至理泐命百工持長鑿大斧剗劈之邑西槐子  
灘巉嶮爲害尤甚怪石磋砑如齒又名壞齒灘冬涸石  
出公僱匠鑿礙舟者表叔闕意琴父邑庠生維聲公曾

壞舟於此意琴含淚嘗指以相示自公平後至今無覆  
溺患其上九龍灘尤險舟稍失勢則破碎沉溺沿岸峭  
壁削峻舊有鎮江廟臨其厂路極仄隘且巖石突阻纜  
不易越鷁上每退牽夫亦往顛公鑿去巨石纜路於是  
坦然歐往來江上榜人屢稱述之故能詳矣至公之孝  
友純篤歐尤知之深公歐外舅也歐家昔居城中射圃  
與公第後院通環圃居人多樹木公與伯父丕承公各  
種百餘株桑三四古柳垂蔭池塘上值春夏交濃綠葑  
翳儼然一村落月夜公時來同伯父坐槐陰竹影間啜

茗將鬚髯慷慨談當世事及古今成敗其時景坡亞伯  
兩兄嘗侍側而歐與樂三兄尋蟲聲螢火於短籬幽草  
邊公見之必呼來前摩其頂課塾中日所讀書或屬對  
當其意輒撫掌大笑其餘不聞出一謔語非孝弟則詩  
書與蠶桑耳外祖母陳太孺人之逝也外祖厚山公年  
杖國公左右承養未嘗廢離以置繼室固請於外祖弗  
許公潛命媒氏聘祖母康乃入稟外祖始知之遂娶而  
生弟子成公公大喜以父有晚景之娛而吾有墳簞樂  
也飢寒飲食公悉體之若啼必抱負繞室常夜半呱呱

聲止而後已厚山公寢疾遺囑三分產業以二與公以一與子成公公恐子孫奉爲命焚其券歐聞諸伯父云今夫擁猗陶富者粟腐不堪食貫朽不可校猶顧惜囊橐較盡錙銖待骨肉若仇讐於後母則恨欲切齒族戚凍餒瘦瘠或至死不一視以人急難爲可樂橋傾路圯目擊顛仆不引手以拯其危擔夫販豎每乘其急而減價售之者皆是也安能散千金爲人除患害立功利成人之美哉此其肺肝尙自恃以爲得意聞公之仁愛可以少愧矣公素有大志嘗謂伯父曰丈夫生天地間達

故兼善天下卽窮亦不獨善其身當以利濟爲念觀傳載諸大端赫赫照人耳目至今遠邇咸沾其利鄉黨亦稱道勿衰可謂不負其志者吁賢矣哉聞之聖王制祭法施於民則祀之能禦大災則祀之能捍大患則祀之如公之入祀可謂合於禮矣初吾蜀舉孝廉數人伯父丕承公以丁艱不果惟公與張公問彤耳道光三十年春正月歐特述其大者以爲後法

書烈婦曾張氏死事

已經隨案請准

旌表建坊

蜀俗女子之嫁延少婦送之謂之送親娘婚夕姑家族

戚子弟具茶酒於房中令新婦親酌謂之鬧房由來久矣戊申冬涂姓爲子完娶曾張氏往送涂之三壻鬧房見婦美謔語及婦婦正色譙呵三壻嫌之夜深氏將寢三壻挾刃強姦遂殺氏輿論紛紛然未嘗有以氏爲烈者余因書其事表彰之以俟采擇焉嗟夫烈婦一弱質耳安能當此三兇耶或疑以三兇之威力不能保其不污似也使果污也不至於死卽輪姦也亦必不至於死婦苟不烈也則必怕死不肯死使三兇果遂其欲也則必不以婦死以不遂其欲也故使烈婦以死謂三兇始欲謀殺非也欲謀姦以洩其怒也其後強姦不遂實因姦而謀殺婦也姦人婦失一婦女節卽殺一婦女也矧強姦不遂而竟殺之乎有謂婦未失節其罪輕不過因婦性烈不得姦耳其意則本欲姦也與姦無異矣謂一人姦而二人未姦二人姦而一人未姦無是理也婦旣失節於一人何惜失節於二人乎婦旣受污於二人又何必獨拒於一人乎想其三兇突入烈婦不知幾爲魄喪幾爲魂飛也欲避之而不得欲脫之而不能欲求生則不免於污欲求死則不得以死倉皇窘急惟大聲疾

呼或有尋聲而援救者孰料三兇懼其呼適以刃加其項而畏之竟因此而殺之吾意斯時婦見其刃而色喜也喜得其死矣設使三兇因烈婦之呼見有來援者各釋之而去不知烈婦其將何辭以自解也不獨自明其未污而人不信卽三兇俱誓爲未染而人亦必不信而今死矣烈婦之心足以白也節足以立也而其烈亦足以著也雖死也則亦不死也世之自命爲儒士與自號爲丈夫者尋常吐肝膽說忠義言交則許以刎頸爲國則謂能殺身眞若可信一但臨小禍患苟畏縮受制於匹夫之下不出一辭垂首喪氣不計恥辱亦忍受之安能冒白刃立節於數兇人之前耶夫文姬之陷於匈奴皇甫規妻之繫於董卓人稱皇甫而不稱蔡者以能死不能死耳斯婦而不死也吾不敢謂之爲烈斯婦而死矣吾不得不謂之爲烈也雖然其志足以悲矣嗚呼天地之正氣有心世道者宜扶持之豈忍阻遏而使淪胥耶若斯婦之志關係匪小當表揚於世以培植其綱常不然畏威者觀此以爲雖殺身亦無補於節則偷生苟活之風將愈熾矣可不痛哉

春秋繁露求雨法 節錄羅江縣志

一春求雨法正月二月三月一先於甲乙日為大蒼龍  
一條長八丈合今官尺六寸二分居中央又為小蒼龍七  
條各長四丈於東方皆東向其間相去各八尺以竹織  
成龍形取吉土填實其中用青紙糊之鬣角耳目爪牙  
俱全用墨畫鱗遮蓋製完待臨時用一每月初八十八  
二十八日於郡邑東門之外為四通之壇方八尺稍高  
於地即止植蒼繒八繒為帛也蒼青色以蒼於壇旁開池  
方八尺深一尺池中貯水水中錯置活蝦蟇五枚一於

南溪縣志

卷八

藝文雜著

二十

壇中設立共工神位備生魚八尾元酒八大鍾淡酒清

酒八大鍾美酒也膊八盤膊脇也脯八盤乾肉也以祭之於

道士端公人役之中擇精潔有體氣瘡疥者不用辯口利詞者以

祝祝祀齋三日臨時穿青衣先再拜乃起而祝曰昊天

生五穀以養人今五穀病旱恐不成敬進清酒膊脯再

拜請雨雨幸大澍所選少童八人即稚童也皆令先齋三日

齋者不食葷腥不飲酒不食五辛晝夜宿於壇中穿青

衣而舞之田嗇夫即里老務農鄉民也亦令先齋三日前齋如穿青

衣而立之又於壇中聚小脚蛇一名蝮蛇一名蝮生山內澤中祈

禱時多聚此蛇置貯水大缸中折柳枝泛其上晒於日  
中得雨卽送還本山又一法取蜥蜴十數條置水瓮中  
令童男女折柳枝曰蜥蜴蜥蜴興雲吐霧天下大雨放  
汝歸去一祈雨之人或端公道士但能事神者集於壇  
上依科行禱日色雖熾不許張蓋一旣立壇便將南門  
闔閉斷人行走置水缸於中門外一選頗曉經義道士  
十數人將木郎神呪誦熟繞壇念之一每過三日不雨  
具生魚八尾元酒八大鍾清酒八大鍾膊脯各八盤祀  
齋三日前人穿青衣先再拜乃跪而陳設祭品於壇上

復再拜乃起祝曰昊天生五穀以養人今五穀病旱恐  
不成敢進清酒膊脯再拜請雨雨幸大樹前選童子八  
人穿青衣而舞之嗇夫穿青衣而立之又取三歲雄鷄  
三歲豶豬即母也用火燒其尾於四通神宇勿令死又具  
老母豬二隻一隻置於北門之外一置於市中令城中  
各更鋪置鼓一面聞壇中鼓聲卽逐鋪傳入市中直至  
北門各用火燒豬尾一凡祈雨傳牌示諭城鎮鄉村居  
民一於皇歷中查水日各里立社焚香致禱社神一各  
家於大門外設香桌水一缸每日祀戶一禁諸人勿伐

古木勿斬山林一里社之溝渠疏浚使與里外之溝相通一於社中各鑿五池池中貯水水中置活蝦蟆每池各一枚一將無主屍骸併各家停放屍柩盡令掩埋一將山谷積水深處開浚疏通一將鯉魚或鼈以狗血塗抹投於深潭之底一道路橋梁有壅塞不行者淘決疏通一幸而得雨以豬一隻酒黍一桌不令豐盛也用白茅爲席不得斬斷所以致潔此得雨之後酬神之禮也夏令四月五月一先於丙丁日爲大赤龍一條長六丈居中又爲小赤龍六條各長三丈五尺尺如前式於南方皆南向其間相去各七尺以竹織成龍形取潔土填實其中以紅紙糊之髯角耳目爪牙俱全用紅畫鱗遮蓋製完待臨時用一每月於初七十七二十七爲四通之壇於郡邑南門之外方一丈稍高於地卽止植赤繒七各長七尺赤紅色於壇傍開池方七尺深一尺池中貯水水中置活蝦蟆五枚一於壇中設蚩尤神位備赤雄雞七隻元酒七大鍾清酒七大鍾膊七盤脯七盤解俱同前以祭之於道士端公人役之中擇精潔有體瘡疥者不用辯口利詞者以祝祝齋三日臨時穿紅衣先再拜乃跪陳設品於

壇□陳訖復再拜乃起祝曰昊天云云五句前畢所選壯

者七人皆令先齋三日臨時穿紅衣而舞之司空官名如無

以道官代之嗇夫解見前亦令先齋三日齋如前臨時穿紅

衣而立之一既立壇便將南門闔閉斷人行走置水缸

於中門外一選頗曉經義道士十餘人繞壇念木郎神

呪一每過三日不雨具雄雞七隻元酒七鍾清酒七鍾

膊脯各七盤祀齋三日前人穿衣再衣乃跪而陳祭品

於壇上陳訖復再拜乃起祝曰昊天云云五句前前選壯

者七人穿紅衣而舞之司空嗇夫穿紅衣而立之又取

三歲雄雞母豬皆用火燒其尾令勿死凡祈雨傳牌示

諭城鎮鄉村居民一凡遇水日城市鄉村人家各祀竈

神一將井泉淘浚使深勿留污濁一將杵臼盡搬本家

門外置之街路一將各里渠溝疏浚使與閭外相通一

於社各鑿五池池中置水水中置活蝦蟇每池各一枚

一禁各家勿得擅動土工違者四鄰舉首季夏求雨法

一禱山林以助之山靈能興雲致雨當禱之以求助一

令郡邑徙市於都邑南門之外五日禁勿得行走入市

一於戊己日爲大黃龍一條長五丈居中央又爲小黃

龍四條長一丈五尺以竹織成龍形取潔土填實其中

用黃紙糊之髯角耳目爪牙俱全用黃畫鱗遮蓋製完

待臨時用聚巫道即祈雨人徙於市之旁爲之蓋以覆之爲

四通之壇於中央植黃繒五黃帛爲旂各長五尺樹之中央於壇中設

后稷神位備母音模飽五盤元酒五鍾清酒五酒膊五盤

脇也豚肩脯五盤乾肉以祭之於道士端公人役之中擇精潔

有體不用瘡疥者辯口利詞者以祝祝齋三日臨時穿黃衣先

再拜乃跪而陳設祭品於壇上陳訖復再拜乃起而祝

曰昊天云云五前句畢所選丈夫五人皆令先齋三日齋者

南溪縣志

卷八

藝文雜著

二四

不食葷腥不喫五辛不飲酒晝夜宿壇中穿黃衣而舞之老者亦令

先齋三日齋如前穿黃衣而立之一既建壇便將南門闔

閉斷人行走置水缸於中門外一選頗曉經義道士十

餘人繞壇念木郎神呪一每過三日不雨具母飽五盤

元酒五鍾清酒五鍾膊脯各五盤祀前齋三日人穿黃

衣先再拜乃跪而陳設祭品於壇上陳訖復再拜起祝

曰昊天云云五句畢所選丈夫穿黃衣而舞之老者穿黃

衣而立之又取三歲雄雞三歲母豬用火燒其尾於四

通神宇勿令死一凡祈雨示諭城鎮鄉村居民一凡遇

水日令城市鄉村人家各祀竈神一將井泉淘浚使深  
勿留污濁一將杵臼盡搬本家門外置之街路一將各  
該里社溝渠疏浚使與閭外之溝相通一於社中鑿五  
池池中貯水水中置活蝦蟇各一枚一令各家祭中雷  
土中堂勿得擅動土工違者四鄰舉首究治一禁男子勿

得行走入市一幸而得雨以豬一隻酒黍一桌不令豐盛也

以白茅爲席不得斬斷以致潔此得雨後謝神之禮也  
秋令七月八月九月一先於庚辛日爲大白龍一條長  
九丈居中央又爲小白龍八條各長四丈五尺尺如前式於

西方皆西向其間相去各九尺以竹織成龍形取潔土  
填實其中用白紙糊之髯角耳目爪牙俱全用粉畫鱗  
遮蓋製完待臨時用一每月於初九十九二十九日於  
郡邑西門之外爲四通之壇方九尺植白繒九以白繒  
爲旂各長九尺於壇旁開池方八尺深一尺池中注水水  
中置活蝦蟇五枚一於壇中設立太昊神位以桐木刻  
成木魚九尾元酒九大鍾清酒九大鍾膊脯各九盤解俱  
前同而祭之於道士端公人役之中擇精潔有體氣瘡疥者不用辯  
口利詞者以祝祝齋三日臨時穿白衣先再拜乃跪而

陳設祭品於上陳訖復再拜乃起祝曰昊天云云五句如前

祝畢前所選鰥者老而無妻者九人皆令先齋三日不食葷

腥酒併五辛晝夜宿壇中穿白衣而舞之司馬官名如無

以巡捕巡檢或營中軍官代之亦令先齋三日穿白衣

而立之又祈雨之人或道士端公但能事神者集於壇

上依科祈禱日色雖熾不許張蓋一既立壇便將南門

闔閉斷人行走置水缸於中門外一選頗曉經義道士

十餘人將木郎神呪繞壇念之一過三日不雨具桐木

魚九尾元酒九鍾清酒九鍾脯脯各九盤前人穿白衣

先再拜乃跪而陳設祭品於壇上陳訖復再拜乃起祝

曰昊天云云五句畢前選鰥者九人穿白衣而舞之代司

馬者穿白衣而立之又取三歲雄雞三歲母豬皆用火

燒其尾於四通神宇令勿死一凡祈雨傳牌示諭城鎮

鄉村居民一禁民家不許焚燬山林不許鐵冶不許將

金銀銅鐵之物鎔化一令各家每日設香案祀門一於

社中各鑿五池池中貯水水中置活蝦蟇各一枚幸而

得雨以豬一隻酒黍一桌不令盛也以白茅爲席不得斬

斷以致潔此得雨後謝神之禮也冬令十月十一月十

二月一先於壬癸日爲大黑龍一條長六丈居中央又爲小黑龍五條各長三丈尺寸如前於北方皆北向其間相去各六尺以竹織成龍形用黑紙糊之鬣角耳目爪牙俱全用煤畫鱗遮蓋製完待臨時用一每月於初六十六二十六日於郡邑北門之外爲四通之壇方六尺植黑繒爲旂各長六尺樹於壇中開池方八尺深一尺池中注水水中置活蝦蟇五枚一於壇中設立元冥神位備黑狗子六隻狗小乳也元酒六大鍾清酒六大鍾解見前脯各六盤解見前以祭之於道士端公人役之中擇精潔

有體氣瘡疥者不用

辯口利詞者以祝祝齋三日臨時穿黑衣先

再拜乃跪而陳設祭品於壇上陳訖復再拜乃起祝曰

昊天云云

五句祝畢

所選老者六人先齋三日不食酒葷併

五辛之物晝夜宿壇中穿黑衣而舞之尉

官名卽今之州縣佐貳首

領及巡捕之秀者

亦令先齋三日穿黑衣而立之一旣設壇便

將南門闔閉斷人行走置水缸於中門外一選頗曉經

義道士將木郎神呪繞壇念之一於壇中假物爲舞龍

一條令不時而舞之欲其不蟄不乖不臥而興雲致雨

也一於境內之名山祈禱欲求出雲助之一每過三日

不雨具黑狗子六隻元酒六鍾清酒六鍾膊脯各六盤  
祀齋三日前人穿黑衣先再拜乃跪而設陳祭品於壇  
上陳訖復再拜乃起曰昊天云云五句前選老者六人  
皆穿黑衣而舞之尉亦穿黑衣而立之又取三歲雄雞  
母豬皆用火燒其尾於四通神宇令勿死凡祈雨示諭  
城鎮鄉村居民一令各家祀井凡井涇則浚之溝渠則  
通之

春秋繁露止雨法

四時雨太多郡縣出示令各居民於皇曆中擇土日塞

水道蓋井禁婦人不得行走入市一郡邑令人打掃社  
壇郡邑若知州知縣或同知縣丞吏與耆夫即各鄉民三人

以一人祝禱皆令先齋三日不食葷酒五辛之物晝夜  
宿於壇備羊一隻豬一口酒黍一桌擊鼓三日而祝先  
再拜乃跪而陳陳訖復再拜乃起曰天生五穀以養人

今淫雨

久雨也

五穀不和敬進肥牲清酒以請社靈除民

所苦毋使陰滅陽陰滅陽不順於天天之意當在於利  
人人願止雨敢告於鼓鼓而無歌至罷乃止一將里社  
用紅絲圍繞十週祝禱者穿紅衣頭戴紅巾以請於社

神祝其罷雨一皆於辛亥之日州縣之社若同知縣丞  
各主之社令嗇夫吏與里長里人至於社下日晡而罷  
晡申時也三日而止如未及三日天大晴可必矣亦止之

### 碑陰

白玉蟾註木郎神呪乾晶瑤輝玉池東盟威聖者命青  
童擲大萬里坎震宮兩騎迅發來大濛木郎太乙三山  
雄霹靂破石泉源通坤震巽戶皓靈翁猛馬四張歛火  
衝流精鬱光奔祝融巨神泰華登雲中黑旛皂纛揚虛  
空掩雲蒸雨屯雲濃闕伯撼動崑崙峯幽靈翻海元冥

### 南溪縣志

### 卷八

藝文雜著

二九

同馮夷鼓舞長呼風蓬萊弱水興都功龍鷹捷疾常禦  
兇朱髮巨翅雙目彤雷電吐毒驅五龍四溟變隸羅陰  
容一聲四海改昏濛雨陣所至川流洪金光流精斬旱  
虹洞陽幽靈召靈籙玉雷浩師變崆峒虛皇太華掃妖  
燼羣梁元皇號前鋒祠泉恣蜃威天公歛火律令翻穹  
窿鞭擊妖魅驅蛇蟲勾婁吉利炎赫縱登僧澤頤悉聽  
從織女四歌心公忠扶我救旱助隆赤雞紫鵝飛無  
窮攝虐縛崇送北艷勅紫虛元君降攝急急如火鈴太  
師律令明萬曆十五年歲次丁亥孟冬吉日

有德者感召天和固

無憂之水旱然天時亢陽不能保其必融茲祈雨以爲不勤奉  
民隱之一助云春主太陽太皞夏主祝融此以爲不勤奉  
祀者以木生火夏則火令非所宜祀不如祀  
共工神能興雲助雨先賢所傳俱有深意祀

賦

七夕賦

以雙星對皎河漢微雲爲韻

邑令

王采珍

攬風光於西顥寄嘯傲於南牕望星期兮匹合知巧夕

兮景撞似煎餅之靈辰

人日爲靈辰歲時記煎餅於中庭

月添乎六較

題糕之佳節日少其雙秋色烘晴恰見綺羅七夕爲綺羅節絢

爛商音入夜乍疑金鐵錚鏦爾乃桐飄金井露點石屏

茶烟欲歇酒力初醒侵罨畫於孤亭微雲疎雨印清光

南溪縣志

卷八

藝文賦

三十

於曲渚鈎月三星漸換暄涼依舊蚊雷鬧黑何來明滅  
簇新螢火流青原夫七之應數復見天心夕之爲時息  
宜向晦悟來往之有期信陰陽之不背銀盤水拍沿韻  
事於化生瓦缶雷鳴見羣兒之逐隊而况薄日嫣花輕  
風響珮秋思果落誰家幽賞總歸我輩橫塘一夕景憶  
舊遊別浦今朝詩傳愁慨懸竿挂屋還自炫於庭中仰  
臥曬書笑已藏之腹內此往士之風流間居之晤對也  
則有牽柔思於杜娘惱秋懷於蘇小碧漢遥遥紅牆皎  
皎月色已闌天光不曉路三千兮人未歸闌十二兮步

常遶羌有情而整線忽無語而停梭悵小姑之處室妬  
織女之渡河曝衣則頻年代作縫扇而此景空過聽蟋  
蟀於金籠俄驚夢短羈蜘蛛於絲網轉惜巧多莫不蕭  
葛飄零共結三秋之恨因之芙蓉淡蕩先吟七夕之歌

温飛卿七夕歌芙蓉  
淡蕩秋水波

至若人問鑄鏡亭午時逢天上洗車

昨朝雨散控白鶴於緱山騎赤龍於霄漢繡屋降子儀  
之庭玉壺置蔡經之案事涉渺茫語隣誕漫綜其義類  
半皆逸史之流傳採入詩歌亦助騷人之染翰於是撫  
昏旦之變候挹山水之含暉藝九畹之蘭香堪紉佩護

一籬之菊葉已成衣詩縱未裁分商風於元圃筆應可  
贈祝魁宿於紫微年光逾半夜漏將稀笙竽溢響瓜果  
陳肥予乃撥燈炆裊爐熏乞新巧搜舊聞清思滌露逸  
興騫雲借七襄以織句憑寸管以揚芬學元暉之作賦  
擬子厚之成文豈免俗之未能聊復爾爾抑有情其難  
遣故茲云云

采蓮賦

前人

維芙蕖之出水倚翠蓋兮田田紅分霞以比艷白抱月  
而增妍襯新粧之濃淡訝梳洗之後先緣風流之有格

謫人間兮尙作仙是以一道裙腰方過鬪草半塘脂粉  
旋唱采蓮亦其浣沙溪畔濯錦江前吳姬十五越女百  
千飄颻兮縣笮邈迤兮畫船蘸影兮游魚避約眉兮翠  
羽憐髻臨風而綠偃衫映水而紅鮮宛凌波之神女步  
洛浦兮翩翩於是穿曲渚過前川盼清姿於澹灩擢纖  
柯以媵娟輕舒皓腕細劈么拳遂雜衣而亂臉或挂珥  
而橫鈿畏修莖之多刺每相戒以慎旃荷花墮兮荷葉  
偏蓮鬚褪兮蓮絲聯香淡淡兮懷盈把懷盈把兮喜欲  
顛則有望澤陂而惆悵思有美而留連冰繭寒兮蠶瘦

南溪縣志

卷八

藝文賦

三二

粉房墮兮露零製爲衣兮誰寄持作鏡兮徒圓花如往  
歲人別幾年人無爲而伏枕花得水而歡眠試問六郎  
似矣何如並蒂嫣然羌無情而有恨隨風月兮遞遷

陸本

魯望詩

念嬌斜之解語終未忍乎棄捐已而遠山挂日南

浦含烟羅衫半濕蓉帶還牽聽數聲之款乃知歸棹之  
緣沿今朝采得花多少隔船動問猶纏綿爲之歌曰采  
蓮復采蓮炎熇五月天柳絮顛狂桃輕薄輸此淨植濯  
清漣風細細水濺濺折來數朵值幾錢東家少婦搖紈  
扇盡日隔牆看鞦韆又歌曰采蓮復采蓮縹緲會嬋娟

柳池花如斗太華藕似船好把隻手次第搴碧玉瑩處  
綠雲擁棹歌宛轉欣扣舷

顧兔賦

以月中之兔搗藥長生爲韻

邑令

翁霏霖

維元菟之靈姿寄優游於明月集雪縷以成毛帶瑤華  
而作骨閱碧漢之春秋依白毫之樓闕獨來獨往訝動  
態之迷離哉魄哉明盼騰精之恍惚由來天上多常傍  
於九霄豈似人間狡但營乎三窟當夫霽容皎潔夜色  
朦朧漸移叢竹半上疎桐知無微而不照覺有物之在  
中每遇圓時卽徘徊而流影倘逢缺處詎局促而逃空

趨皓魄以循環渾如踏鏡望微雲之點綴不是罹罟蓋  
不特養物有功神因封於卯地亦且學仙得術靈長守  
乎月宮夫其長鬚莫卽缺口難窺湧素質於一輪依依  
遇也現幻容於七寶在在仰之吐自口中居非隣於東  
郭飛從背上異不等於天池豈是圓影清虛故頻爲之  
眷戀不識廣寒縹緲果孰得而羈維此則凝神而彌遠  
亦顧盼而生疑者也然而山澤固產其飛潛太虛亦蕃  
夫毛羽繫神物之有靈悉洪鈞之所鑄所以見日者每  
想於流烏望月者更言於顧兔置身最上眺萬里之山

河絕類而遊收一天之風露爲醜爲媿渾難立其主名  
不角不牙應自安其故步欲守株以相待空懷桂樹之  
扶疎卽佩玦以共追莫挽冰輪之轉度有時踞尾依嫦  
女以趺居幾度回頭對梵王而却顧分明常居月腹訝  
厥利之維何若謂難在水中笑斯言之已誤爾乃疎雨  
初收浮烟盡掃奏霓裳而唱和曲正堪聞操杵臼以婆  
婆藥還頻擣態未離於爰爰神好遊乎浩浩生來海上  
幾疑濯影於清波印却林間錯認爭羣於芳草蓋指蟾  
宮之掩映清輝瑞彩若得象而乃彰而照

鳳闕之巍巍月德金精更依光而益好乃知氣必有所凝而  
形卽有所托千年計壽雅伴蟾蜍三匝繞林能驚烏鵲  
本來明眎愛窺匝匝之花何自輕身緣竊刀圭之藥遙  
思瓊樓斜倚更成營宛之觀試問丹竈驟投那似流天  
之樂嗟乎傳奇非一結想方長鼇戴山而鼉肩龍銜燭  
以飛揚神鹿兩頭夫誰爲之撰體雄虺九首復何故而  
異常事疑冥渺語豈荒唐醉讀離騷之什長歌天問之  
章羌留情於穴鼻遂搔首於夜光衣褐是占恰好向結  
璘而得筮忘蹄有喻更欲尋素宇以談莊豈似隱霧澤

毛漫說山間之元豹穿泉誌怪徒驚井底之羶羊是故  
懸金鏡順璣衡符久照叶長生望瑤光之不缺知玉兔  
之無驚繞樹常馴銀漢三更景靜入簾欲動雕闌幾處  
人行或曾傳爲月氣實自秉乎陰精又甯羨抱朴子丈  
人之號與昌黎毛穎之名也哉

冬日可愛賦

以未消埋徑雪先  
暖讀書帷爲韻

前人

暘谷騰輝咸池浴氣披宿霧之鬢鬆掃浮雲之鬢黷亭  
名在午昞稱自未瞻照臨於四序縣象無私被和煦於  
一冬依光堪慰灰飛葭管賀至日以履長表樹桐圭異

南溪縣志

卷八

藝文賦

三五

赫曦之生畏洵陽德之昌明洽休嘉於庶彙當夫坎乘  
節序亥指斗杓聿傳耜草未及頌椒冷擁霜鐘間蓮花  
而俱滴寒凝冰筴斟竹葉以難消鳥語弄晨開新晴於  
碧落林霏漏影挂曉旭於丹霄沸百仞之流珠乍颺彩  
鳳騰一輪之頰玉恰起陽暉觀者欲憺企之孔昭栗烈  
之嚴威頓改氤氲之淑氣偏饒已而色將籠戶晷漸侵  
階突烟起兮陽回黍谷千村麗風影收兮彩徹梯巒列  
岫排藹藹迎人不羨蘭湯浴賜温温燥物何須獸炭灰  
埋蓋北陸是行曾聞史官之占候而東隅未逝正動壯

士之勵懷乃若桑野次來昆吾對定縣隆照之崇高運  
正中之緯經風雖過而非寒雲未歸而不暝斜暉已度  
乎兩竿疎影遍穿於三徑山梅破萼窺晃朗以增妍岍  
柳藏腰暎照融而欲醒孰不臨佳景以怡情仰曜靈而  
適興則有東郭清寥西齋高潔壺每貯冰硯還映雪寒  
羶坐破偏辭鹿漬之遺敗絮擁殘莫解鶉衣之結迎曦  
開白板滿座春生照讀繼青藜半牕瞰徹陰消陽長參  
見復於天心禹寸陶分步遺風於曩哲渺仙家之幻術  
吐火無多笑僧舍之奇踪然香始爇至夫棲野店而起

遲河梁百二倩疎林以挂住道里八千輶器流膏勞征  
夫於來往鬱儀轉軸同過客之後先滄海匪遙凍解青  
絲之笮長安可近輝揚白玉之鞭溫無勞乎挾纊燠豈  
遜於裝棉旣已載道忘疲羣欣炙背何至當途苦冷致  
歎聳肩况乎宮壺之賜方新錦燠之頒正滿藥闌量影  
看入直於五磚芸署烘晴喜曝書於三館對小春而眺  
景銀海光搖頰亞歲以迎祥玉堂氣暖蝦鬚捲霽靈暉  
移玳瑁之鈎雀舌分香瑞色映琉璃之椀依之有耀意  
自覺其溶溶就之堪親情更呈其衍衍爾乃望芳郊盼

茆屋繡壤千行輞川一幅哢哢旭影迷離軟草臥烏龍  
冉冉夕陽平遠層山驅黃犢爰聽雞而倚杖來野老之  
負暄或捫蝨以解衣嘲田夫之獻曝深閨鳴刀尺隨寸  
晷以添紋比戶歇犁鋤趁三冬而課讀此又澤溥吹豳  
歡聯鼓腹遊化日於寒亭戴光天於煖谷者也是故屋  
斗之分垂於月令星昴之命肇自虞書日自麗天臨於  
冬而向榮倍切冬原成物暄以日而煦嫗有餘值時暘  
之應候信愛慕之非虛豈似驚難留於過隙而歎莫挽  
於翻車彼夫引涼飈以入幕鑑明月而披帷名時雨於

南溪縣志

卷八

藝文賦

三七

亭中爰以志喜望白雲於嶺上只可自怡孰若時當寒  
沍景絢雍熙烈火司權既不等於秋陽之暴羲和按轡  
更漸回乎春日之遲方今

皇仁廣被出治繼離咸飲和於無盡亦順則而不知鄙驩虞  
之小補陋雜霸之已卑湛露晞兮卿雲爛龍鱗繞兮雉  
尾移有是哉望氣扶桑甯復向趙衰而比績而舉頭太  
華還將齊冠準以吟詩

詩

南溪別業

唐  
岑參

結屋依青嶂開軒對翠疇樹交花兩色溪合水重流竹  
徑春來掃蘭樽夜不收逍遙自得意鼓腹醉中游

巴山舟中陸渾別業

前人

瀘水南舟遠巴山北客稀嶺雲撩亂起溪鷺等閒飛鏡  
裏愁衰髻舟中換旅衣夢魂知遠處無夜不先歸

張舍人南溪別業

釋法震

新田遶屋半春耕藜杖閒門引客行山翠自成微雨色  
溪花不隱亂泉聲漁家遣到堪留興公府懸知欲厭名  
入夜更衣明月滿雙童喚出解吹笙

南溪縣志

卷八

藝文詩

三八

南溪書院詩

楊發

茅屋住來久山深不置門草生垂井口花落擁籬根入  
院將雛鳥攀蘿抱子猿曾逢異人說風景似桃源

別南溪詩

李涉

如雲不厭蒼梧遠似雁逢春又北飛惟有隱山溪上月  
年年相望兩依依

常歎春泉去不回我今此去更難來欲知別後留情處  
手種岩花次第開

夜雪泛舟遊南溪詩

韋莊

大江西面小溪斜入竹穿松似若耶兩岸嚴風吹玉樹  
一灘明月曬銀砂因尋野渡逢魚舍更泊前灣上酒家  
去去不知歸路遠棹聲烟裏獨嘔啞

平蓋沼詩

紀道德

勢壓長江空八陣吳都仙客此修真寒江向晚波濤急  
深洞無風草木春江上王人應可見洞中仙鹿已來馴  
龍車鳳輦非難遇只要塵心早出塵

南溪對雪詩

宋 蘇 軾

南溪得雪真無價走馬來看次未消獨自披榛尋履跡

南溪縣志

卷八

藝文詩

三九

最先犯曉過朱橋誰憐破屋眠無處坐覺村居語不囂  
惟有暮鴉知客意驚飛千片落寒條

右蘇東坡先生南溪對雪詩見名勝志按施司諫註蘇

詩此詩編於鳳翔僉判時作題云十二月十四日夜  
微雪明日早往南溪小酌至晚又有南溪會景亭五  
古一首南溪茆堂五古一首南溪竹上二首與此詩  
同編似係鳳翔之南溪曹蒼先生博雅多聞或別有  
據故仍錄之

資聖院詩

孫 諤

四山藏一寺方丈壓諸峯回首坐禪處白雲深幾重

南溪詩

楊輔世

碧玉寒塘瑩不流紅蕖影裏立沙鷗便教不作南溪看

當得西湖十里秋

宋詩紀事

李公洞詩

一作仙人李真自題詩

楊萬里

李真宅子故依然道院西偏石洞前一日身遊八百里

三番花落幾千年

入南溪詩

潘希白

沙頭落月照篷低杜宇誰家樹底啼舟子不知人未起

南溪縣志

卷八

藝文詩

四十

載將殘夢上南溪

宋詩紀事

雲臺山詩

元 廖蜀望

雲臺突出眾山低小徑縈紆上石梯古寺獨存山寂寂

斷碑惟覆草萋萋滿空香散春蘭綻萬壑烟生晚樹迷

爲愛其間風景好登臨幾度杖青藜

題雲臺書院詩

前人

牕外翠搖鶯喚柳簷前影動鶴翻松晝間對景無餘事

一曲瑶琴奏午風

雲臺山摘茶詩

明 邑人 汪忱

傍竹沿溪茶數柯報君指下莫傷他來年更有新條在  
贏得東風雨後多

攜籃過嶺掇龍芽嫩葉新枝帶露華活火覓泉和月煮  
不知正味落誰家

剪茶山北與山南收得龍芽綠滿籃七碗消除高士渴  
更無塵夢到茅菴

銅鼓灘紀事詩

錢載

蜀道艱難五月程家山迢遠不勝情千灘萬石奔流險  
舟到人頭嶺岸行

南溪縣志

卷八

藝文詩

四一

南溪舟中與劉承之話舊詩

楊慎

晴江初月對佳人明燭深林慰苦辛征棹來帆成白首  
鳴儔嘯侶憶青春萬重關塞浮雲外咫尺滄浪積水濱  
歌罷語闌還別去朔風寒雪倍傷神

過南溪懷劉參之承之兄弟詩

前人

京國交游四十春劉家兄弟最情親風流雲散三生夢  
水逝山藏一聚塵沙步維舟催解纜隣村聞笛倍沾巾  
可憐烟草江安樹愁見當年送別津

題水月樓詩

李廷龍

飛鳧搖蕩巴渝水問俗尋登江上樓徒倚閒雲生石壁  
凭軒清籟自靈邱鳥從竹裏分新逕風在楹前動小鈎  
相望川南民皞皞一時經濟與君收

水月樓詩

邑進士 劉景寅

漫爾登臨一快哉老僧與我共徘徊門前流水自消長  
石上浮雲閒往來俯仰不同今宇宙等閒疑是小蓬萊  
叟叟寫得遊山記莫使蒼虬隱翠苔

同弟侍御遊琴山詩

前人

虎溪龍井共前緣邂逅秋風載酒船白足迎來門不二

南溪縣志

卷八

藝文詩

四二

紅塵隔斷路如千爲應學佛無靈運且喜能詩有惠連  
巖閣短碑吾記在更將何語壯山川

登上巖喜雨詩

前人

一株石筍連雲起撐立西南別洞天蘭若幾時開石逕  
禪關何處是雲巔風生萬木舒清影雨過千山點翠烟  
乘興不辭苔蘚濕甘霖今已足西川

歸田結廬山寺詩

邑人 陳準

沿逕花紅白幽人獨自看午晴蝶夢久晚雨蛩聲殘虛  
室咽泉譜空階淨月闌眼前無俗物欹枕就欄杆

問予何所樂無事小蓬萊榻對青山臥窗迎綠樹開窺  
籬得竹月香几是庭梅逐日隨分去清閒頗裕哉  
幽居忘歲月懶拙任年催雨洗山泉路風清貝葉臺拋  
書倚竹臥抱甕對僧開春到不須記嶺頭一樹梅  
何敢輕逃世本來愛住山龍吟淨谷口虎嘯壯松關詩  
自醉中得身從貧處間不干名與利無事到塵寰  
大桂輪山詩  
戴 弼  
覽秀登高一嘯長滿天雲淨濶江光當年留記人何在  
忙裏偷閒且盡觴

南溪縣志

卷八

藝文詩

四三

仙臨寺詩

邑令 高 暘

高坎曾傳仙女臨飄搖色相日森森石巖靜引煙雲裊  
喬木徐回鐘磬音幾度與人愁遠涉數聲牧笛落遐心  
何年得與玉姬會白鷓青鸞護盍簪

聞普惠寺鐘聲詩

前 人

傍嶺僧房傍曉鐘悠然金闕控飛龍山即此名蓮生馬湛溪名  
翻晴雪偈感雞鳴名山逐曉風灘震遏雲頻擊鼓寺對岸為銅鼓

灘溪尋摩稻名溪漫扶筇羣仙此日成嘉會鳳管鸞笙喜

再逢



憶昔與君少壯時洋洋騎馬趣京師看花同榜結兄弟  
心期甯若游俠兒後來蹤跡多阻絕祇今已是十年別  
雲漢塗泥音信疎病軀幸免膏魚鼈放歸謝客棲林邱  
聞君才調卑前修隱有經綸成國是終看黼黻資皇猷  
往年使者經鄉縣傳云不幸遭家變小舟未向山陰乘  
生芻尙缺封邱奠雲山西望時增吁偶煩尺素遠招呼  
舊情高興兩奇絕交道今人豈卽無蕭條十日臨宅里  
一見風流非昔比把臂慰勞淚落泉座中秉燭勤相視  
飄飄書劍同出門殊方骨肉多溫存夜牀風雨話心曲

南溪縣志

卷八

藝文詩

四五

違山車馬聞元論野人正自苦離索遨遊更幸隨鵬翮  
盃酒龍騰月下斟可憐又作孤征客孤征客將誰依江  
干回首魂飛飛人生萬事如流水異時會聚那可得君  
心念我厚贈我以瓊玖相看不忍言欲去重攜手攜手  
丁甯道年華易衰老此身譬寶鼎安置勿草草打鼓開  
頭歌一聲孤舟渺渺大江橫與君眼底成萬里記取夜  
來座上盟莫愧龍騰罔此生

龍騰山詩

前人

龍峯曲曲抱江城萬里雲霄一帶橫江面鳶魚隨幻浪

天邊星斗拂禪楹丹衷耿耿懷楓陛赤子依依樂歲成  
老衲敲鐘能解語白雲紅日甚關情

琴洞詩

闕濟

成連不復見太音誰與希山水託知心千古一鍾期不  
學昭文<sup>缺</sup>且和淵明詩白雲洞口生清風與之歸石壁  
滴空翠松風涼我衣橫膝調素琴泠泠奏清暉心以靜  
而恬樂以和而微元鶴蓬島來相對渾忘機物我兩俱  
化悟者其庶幾寄語後之人勿墜<sup>缺</sup>芳徽

歸田十咏詩

邑人樊垣

南溪縣志

卷八

藝文詩

四六

招隱無窮問小山於今拾得半生閒身從塞北三經後  
歸臥城西十畝間峯色層層輸紫翠溪流曲曲弄清潺  
昨宵夢入方壺境好取琅玕待我攀

歸休從此是歸休且喜秋霜未上頭慣辯鳥言因久狎  
能馴鹿性與閒游茸茸階面苔侵履隱隱池心月映樓  
饑即加餐慵即臥懶隨江左學風流

春來杖策理羸畦日日呼童到郭西世態久知蚊蚋過  
閒情早把鷓鴣齊曲肱化蝶瞿然舞隱几嬌鶯自在啼  
水面落花紅片片小池那不是桃溪

春江雨過浣晴沙早起科頭看曉霞雲鶴高原飛卓錫  
浴鳧遠水泛虛槎浮名於我杯中月快意當前擔上花  
閒坐閒行閒檢點此身終不似蓬麻

廿載功名歷險巖於今種種鬢交垂游魚驚餌潛深壑  
飛鳥巢林借一枝寂寞閉門楊子宅風流騎馬習家池  
冥鴻矯矯無踪跡萬里長空任所之

蒼松翠竹景沉冥一到此中眼便青倦倚藤牀支瓦枕  
閒翻玉笈玩丹經身同泥上秋鴻跡誰問簷前午鵲靈  
都笑楚原凝滯見行吟獨自了清醒

幽懷不與俗塵同一徑惟邀二仲通池上放歌山吐月  
松間醉酒鳥呼風相期汗漫小天界閒把蜉蝣笑域中  
今古悠悠無限事覺來盡付大江東

小圃花欄遶水亭百花隨意弄芳馨無營掃榻閒栽薜  
有客題扉爲負苓竹影日暄風滿座松花春釀酒盈瓶  
從知天地無終極一指齊來是大甯

醉眼猶能笑二豪漫勞耕叟歎滔滔思登碣石閒觀海  
恥向王門學賦濤落落池心秋漢淨疎疎簾月夜山高  
飄然從作遊仙計故向人間脫錦袍

平生樂事任安排春到山家景却諧青鳥踰躑窺網戶  
綠楊孃嫋拂芝階興來酌酒臨風洞靜坐彈琴對月崖  
安樂窩中尋邵子從今打箇混塵乖

南溪石棧工成詩

并序

明四川按察副使 駱日升

神宗皇帝四十八年夏六月余來敘州王路子經南溪之  
潭不可行問土人舊以爲病因與邑令王子謀修之  
卽捐俸召匠伐石旬日輒攜鹽米舖騎巡行犒勞十  
幼率子弟更番砌築成之起黃葛舖抵富順界八里  
里南路抵邑六十里經始是月十三日泰昌元年冬  
告竣先後六閱月余次第獎賞長老蒲祚凌等紀其  
年月於此王子名碩  
輔貴州畢節衛人

明興二百五十秋列聖涵育生齒稠士紳誦說長老絀

南溪縣志

卷八

藝文詩

四八

子弟力穡歲有收風尙淳古無怨尤名城

缺缺

到邊頭

南溪之邑路兩週上通梁邑下渝州重山疊嶺遠悠悠

荆棘覆路

缺缺

裘六月泥濘火鬱收人行到此汗交流

馬亦躑躅不自由十步九頓空逗留我聞人吏語嘲啁

千百年來苦瘡疣邑有良令與眾籌乘茲農隙工可鳩

捐資補道出通郵轉石負土填隘湫開鑿之值官與酬

巡行勞徠旬一周里父呼吁歌吟嘯父耶母耶爲我謀

平我低窪棧我邱白日窳褻失隱幽旁有畦塍漱水流

霖潦不復嚙平疇直者如弦曲如鈎行人昔苦今有瘳

飛鞚走馬風颼颼缺 缺不動宛龍游梁稻西成報歛秋

棲之嵎路簸或揉朝呼夕喚羊與牛千蹄缺 缺恣並騶

老人扶杖稚子搗婆娑曳屨日夷猶沾體塗足永不憂

使我子孫缺 缺偷我來一望素光浮百里平鋪白玉球

下車緩步遨以遊欲去不去忽淹留吁嗟我民今且休

爲爾勞苦相噢咻誰造爾福恩渥優蕩蕩平平帝大猷

吁呼良令孰與儔

南溪登城詩

國朝邑令 王大騏

登城一望水連天浪滾桃花捲地簾西漾桂輪搖夜月

南溪縣志

卷八

藝文詩

四九

東浮瀛閣起晴烟文琴有意冥中合白鷺無心磧上眠

身坐落霞思不淺晚風岸泊楚江船

龍透洞詩

前人

景從龍透始云奇那許登臨不費思爽闢重關通秘竅

暗流石髓養神芝兩牕對接雲生處一夜雙明月照時

謾道仙人無托跡暫留片刻已神怡

題張氏烈女詩

前人

烈性由天植貞懷已熟籌倉皇依地薄慷慨絕塵優知

有江聲淨那存浪譽浮留神頓駭逆半晌足千秋

小小天桃性能堪千古磨握瑜回皎日抱石鎮頽波綠  
水凝香永青山減黛多潔身報罔極不必孝曹娥

南溪八景詩

錄四首

前人

江畔誰題漂海樓海樓何自倚江頭江聲一躍驚蜃起  
海國平飄片石浮深宿暮雲排玉榻暫飛曉月侵銀鈎  
仙源應有滄桑約接代而令下幾籌

海樓烟雨

烟波選勝桂橋溪綠柳斜陽繫釣絲款乃一聲和月白  
摩挲三弄遏雲遲篔簹竿已拂珊瑚樹野老猶傳篔簹時  
恃有懸魚勵勁節行將還汝舊鷓鴣

桂溪釣艇

南溪縣志

卷八

藝文詩

五十

靉靄瑞雲墜古邱和烟蕩作北山頭經時不改夏秋態  
歷雨無關疎密籌彌望蒸屯橫氣象登臨滄滄擁豁心眸  
高吟捧出凌霄去飛向天門五色流

瑞雲靉靄

何年單父涖江頭遺却名徽此地留一水中涵仙子曲  
兩山對出松風秋千戈頻擾元音歇角徵漸調焦尾收  
倩得五絃彈夜月南薰拂拂到虛邱

琴山松風

南溪八景詩

錄一首

邑人

呂聲南

瞻彼平原隔岬阿溯洄無盡且臨河星光碧水時相映  
幽士征人日往過霖露旣晞凝白露樵歌歸唱和漁歌

古來江上烟波客擊楫中流有幾多

蘆亭晚渡

題諸葛武侯姜伯約祠詩八首

邑令

宋

鑑

乾坤間氣毓殊英兩字忠勤早定評西蜀登壇推後進

南陽入室待先生三分業已留殘局六出勲期續盛名

成敗由來無足論偏於盤錯表錚錚

昭烈艱難闢此疆嗣君容易變滄桑處堂最喜偷安語

曲突甯知先事防失禦魏師同縱虎乞憐鄭伯獨牽羊

盈庭不恥譙周策愧殺男兒北地王

投戈歸命詔驚傳遜國從無此自然將士同仇惟搶地

南溪縣志

卷八

藝文詩

五一

元戎何策可回天未嫌塵土聊蒙面曷藉風雷再躍淵

堪歎棘陽痴父子

鄧艾子忠

杜郵飲恨情誰憐

從來慷慨不爲難未卜興亡且試看但願故君無北轍

何妨降將托南冠傅公取義盟金石令子成人繼羽翰

關口守將傅公簽武侯子瞻父子皆死於難

共此寸丹期有濟况當時事等

狂瀾

運盡金刀剩魏吳數當典午遞相無壘臣

謂公

報復羣心

忿叛將

鍾會

譁張攘臂呼萬死難忘惟社稷一身何有况

妻奴巍然雲棧新祠廟今日忠奸始見圖

蠶鳥魚鳧龍鳳開一羣蜂螫却成灰賊闔蔽日妖巫進  
狡寇摩天勁旅來漢鼎足顛傷玉鏡魏宮心醉泛瓊林  
遭逢若此真無柰任爾師生管樂才

陳壽留心珥筆臣當年覩記悉躬親搜羅似屬無遺意  
議論終嫌未盡神豈涉晉君多顧忌抑因漢相寄餘嗔  
紛紛謗佞都成史何怪斯篇頗亂真

琴筆僧牕漸養陰愴懷舊事費沉吟月昏露冷青燐焰  
烟鎖雲封白骨深閣聳千尋標大節原名五丈結同心  
茫茫不盡英雄恨長托雙銛峙古今

南溪縣志

卷八

藝文詩

五二

南溪八景詩

前人

鴉背送殘陽蒼蒼江水暮鳥影落寒沙人鬧蘆亭渡漁  
舟破浪來唱晚歌相互流霞雜鶩飛不辨真與誤指點  
釣人居踈踈燈影露彌望久徘徊夾岸烟迷樹

蘆亭  
晚渡

一嶺削不成煙中隔水橫一琴時自鼓松風流其聲成  
連海上奏嵇散曲中情公餘一坐對月明幽興生逸響

飄然來彷彿弄瓶笙不知山水音何以如許清

琴山  
松風

山色暮仍早日落西復東夕陽無限好盡在龍騰中江  
波遠射壁野火忽燒空清磬破煙鳴歸鶴帶霞烘低映

瀛洲綠高曝滿城紅藹藹初升時此景將毋同龍騰晚照

人愛江水清我愛江水白江清逝如斯月白介於石一

鏡湧洄瀾了了無痕迹江流月不流江隔月不隔天上

有往來人間無變易此理試潛窺千潭妙可獲鎮瀾月夜

仙觀擁高峰晴霞曝如霧一色起赤城朝朝復暮暮金

碧明梵宮丹黃雜茂樹滿天自捲舒流影齊孤鶩恍有

飛仙人往來巧爲布餘輝夕照中散入江無數仙觀晴霞

封中何所有似煙復非煙糾縵湧晴空遙覆此山巔金

枝互搖曳玉葉相輝鮮古寺森魚鱗疑住蓬萊仙不滅

南溪縣志

卷八

藝文詩

五三

亦不收望氣自年年化作一天霖沛然灑大千瑞雲變

海樓似畫圖蒼蒼而莽莽煙雨接瀛洲一氣渾無兩攜

酒時登臨奇觀愜幽賞紅樹迷遠津輕舸飛畫槳都在

雲氣中微茫費摹倣真不隔仙源奚羨南湖上海樓煙雨

春漲水如泥浮棹入桂溪平疇花錯綺路不辨東西紅

鱗次第降以柳貫而攜晒網日卓午茅屋有鳴雞一咏

還一觴仙乎仙乎兮歸來繫釣船斜影夕峯低桂溪釣艇

別擬仙源八景詞調寄鷓鴣天 邑令 羅道達

城臨萬里錦江煙一帶清波映碧天來從玉壘原泉靜

去通巫峽海門連 雲漠漠水潺潺  
樓縹渺浪花前

吳楚松舟灘下集 青高斜指鳧溪邊

錦江煙水

春流澄澈曉光臨 滾滾波翻石筍痕  
瓊樹有根泉下種

籀龍未舞沚邊生 琇瑩色篠簞  
英嫩玉深藏待日晴

江津不是篔簹谷 何年出水作簫聲

石筍晴瀾

兩岸青山擁桂溪 月明清映雉城西  
波光瀲灩晴雲覆

秋氣蕭森晚樹迷 玉輪轉桂枝  
低上下晶瑩似火齊

橋頭剩有才人句 碧水幽香一筆題

桂溪夜月

雲臺北枕勢如蹲 疊出巒煙冪  
晚村杳靄春深橫玉骨

南溪縣志

卷八

藝文詩

五四

氤氳秋老露靈根 崑龍起岬岬  
存龍蟠虎踞曝朝暾

鬱鬱城闈佳氣繞 水痕澹蕩接山痕

雲臺嵐翠

霞棲千丈拂岩嶢 瞻望龍騰紫閣翹  
山勢蜿蜒雲外度

露華濃艷樹間銷 虬欲動天將曉  
巖谷生輝映九霄

彩溢螭頭啣日色 行空鱗甲耀崇朝

龍騰朝霞

澎湃江聲作鼓聲 無端駭浪震山城  
揚波夜靜旋龍泣

激石風狂乍虎鳴 扁舟急暮雲橫  
飛花濺水錯瑤瓊

縱非金鐵錚錚響 盈耳春濤怒不平

銅鼓怒濤

錦繡城邊列玉屏 化工特造沒絃琴  
嵯峨有案橫焦尾

瀟灑因風弄好音 清廟器太古心翠嶺蒼蒼峙百尋

子期不遇終寥寂誰聽松聲想鳳吟 琴山松風

雨過江村湧亂流煙雲竹樹護瀛洲四山翠合千竿舞

二水波環一岸幽 迎仙塔擁星樓方壺圓嶠海中儔

有士憑高閒眺望晴沙面面浪花浮 瀛洲竹雨

九日登龍騰山詩 邑令 徐志鼎

秋氣洗山骨浮浮清道心林開樵徑潤水殺漲痕深涼

暑亭邊路 舊有黃山谷書涼  
暑亭三字石刻 茱萸酒滿斟家鄉兄弟集

應笑獨登臨

南溪縣志

卷八

藝文詩

五五

對菊詩

前人

瀟灑園林白露滋重陽愁對好花枝最憐淡到無言處  
絕愛香添晚節時舊雨幾番勞短夢新寒一徑入踈籬  
朝來送酒何人至孤負秋容自咏詩

迎春示賓僚用東坡徑山道中答周長官韻前人

迎春於東郊地占龍騰勝江涸走無聲石立沙明淨生  
氣已回青露出梅梢瑩作吏半載餘怕肆殘忍性退食

訪輿論祝詛一一聽前月降瑞雪早卜豐年定家家釀

春酒父老雜醉醒竹馬延街居歡迎忘朝暝吹笙兼擊

鼓驚動斗回柄鰲山幻魚龍舉國狂填逕或化瑤臺仙  
眉黛遠山映新試六銖輕肩頭盤雪磴儉果是美德唐  
魏風堪鏡休嗟日月慆載歌蟋蟀咏纏頭不惜賞人將  
笑牧令况貧是家風破書馱半乘苟或變面目名何以  
實稱約身偶涉奢上感下必應僉云昂米價室豈無懸  
磬思道民禮義思絕民爭競齋厨眞索然僅免魚生甑  
俸錢愧虛糜敢自嗟蹭蹬將伯呼素心第一要知命濁  
腸旣云滌貪念尤當併愛參三昧禪莫盡十分興余也  
招愆尤公等戒標榜

南溪縣志

卷八

藝文詩

五六

梅花詩

前人

繁華無夢破巖阿踈影枝枝映綠波月到中天涼似水  
煙迷空谷白於羅逢人傲骨清如許表爾冰肌冷若何  
獨向白花頭上放不知幾歷歲寒多

打麥詞

前人

綠波漾漾黃雲卷腰鎌發鋤和雲剪早起割來置田頭  
忙忙結束覓火伴播穀初喚鳩復鳴炊飯未熟杯壺傾  
收拾新場平如掌來牟曬去割隣壤昨日天晴今日陰  
明朝天道變愁霖呼童趕雞雞膈膊耒板連村聲閣閣

題烈女祠詩 并序

郡守 沈念茲

南溪烈女黃帛束漢人其夫張貞沉大江烈婦投水十四日抱夫屍同出邑人立廟祀焉乾隆乙卯冬因

公過縣翁明府見示本末賦詩以誌表微

遺廟南溪不計年江流活活映嬋娟漢家城郭今何在

烈婦形容尙儼然自有貞名光女史還留精魄降神弦

謁來椒菊登堂薦嗟爾男兒當愧焉

鳳翔書院開館率生童摳謁賦二十四韻示之並呈敬

映海院長詩敬名華南成都人邑令翰林改補常熟縣 翁霏霖筠樓

大業新傳衍諸家定一尊不因成指授安得探淵源道

南溪縣志

卷八

藝文詩

五七

以文章著人先品行敢負墻憑細講促席或同論夜雨

侵牕潤春風列座溫書聲鐘作限詩思墨留痕落落襟

期遠恂恂意氣渾就中頻說項何事復推袁况是奎占

聚剛如律應元棟梁真蠹起羽翼必騰騫雁陣符賓主

書院中各隣邑俱同肄業 棠華認弟昆及時齊假館隨寓任開軒繫

古功名樹都從俊秀掄教常周里黨學不問田園勉爾

窮經事懷茲勵志言相將成竹箭好待采瑤琨自笑腰

徒折猶然舌莫捫得毋同技癢故乃又聲喧官舍全依

郭精廬半隔村青雲何藹藹活水自泝泝恰記流觴近

爲看執贄繁弦歌誠未逮管領敢辭煩槐舍羣才出謂禮

堂固村蓬山宿課存鳳翔千仞處珍重入師門

南溪賓興詩四首  
前人

三載賓興重禮儀人才今與古相期慣穿楊葉憑誰手

忙踏槐花又此時衣鉢登堂都北面謂映海時主講鳳翔書院杯盤

促席卽南皮寥天獵獵秋風起獨對高齋有所思

白紵青袍士五千當時逐隊故依然一行漫附冰壺吏

九轉誰尋藥鼎仙心喜乍應緣見獵道存未敢笑忘筌

識途老馬衰頹甚慚愧風塵說祖鞭

南溪縣志 卷八 藝文詩 五八

芳洲高閣擬蓬瀛映帶週遭水竹清瀛洲閣在東門外爲南邑勝區暇

日篙頭曾一到斜風篷背最多情地靈自合占新兆才

聚知應稱舊名還記楊公遺蹟否夜來月下舊志有琴聲

古學宮旁有楊發遺蹟每聞琴聲必多科第

階前尺地盡風雲冠蓋相隨待使君暫放簿書親把酒

翻從羽檄共論文時正辦西藏軍需及時裁剪成花樣何事馳

驅逐馬羣知爾登程好攜手天香蟾窟正紛紛

春日官舍詩四首  
前人

小草無端遠志移霜砧暑葛已頻時此邦差喜安予拙

爲政何能與古期本不脂膏甯剝削縱非盤錯亦支持  
新絲舊穀知多少試向蒼生一察眉

似舫官齋洒掃頻宗文四壁當遊人漫將癖性爲醫俗

依舊虛名不救貧梅澣白雲俱名里多樹色杏園紅雪有

花身湘簾半捲香絲駐管領春光得得新

粗酬簿領便高歌笑指晴雲藹藹過知己親朋別時久

依人僮僕薦來多當春劇愛留鶯住終日其如相馬何

時辦雅安協濟站馬輕槳短篷溪下上畫船深負此煙波時製小舟頗雅

潔

南溪縣志

卷八

藝文詩

五九

几間文牘日紛拏痴向官衙說著書夜靜燈花依筆硯  
年來詩草半舟車何人劍閣勒銘好終古琴山橫膝如  
博得繫匏翻自喜頭銜猶傍放翁居

題侯固村同年百衲齋

前人

心齋坐處便相宜榜子新添博士扉詩律持堅憑擊鉢  
文章悟到待傳衣因緣小屋留春暖點綴疎窗漏日晞  
更有漆紋眞太古百衲紋琴者琴山高意總依稀時固山村寓

院書

夜宿李庄詩

前人

入境依然泊夜航人煙最數李家庄地沿熨道尋孤驛  
江合戎城記一塘別渚蒿蘆秋淡蕩隔堤牛馬水蒼茫  
雙魚藉手勞相問深愧扶筇父老行

細雨廉纖夜色渾船燈漁火點江村也知記里猶行部  
亦似還家欲到門問渡仍移楊柳棹擬自楊柳推篷眞

負菊花尊

舟中菊花開已半殘矣

明朝到署拒霜發應共林塘秋

景論

石筍舟中詩

前人

片雲捲盡大江流水驛嚴程當置郵多謝天公不相負

南溪縣志

卷八

藝文詩

六十

一天明月送回舟

波光下上漾漣漪兩岸青山似昔時借得長江還自照  
恐教面目或推移

汪家場遇雨詩

時正望雨

前人

散絲一夕影徐徐匝路泥深欲點裾野老自應停抱甕  
使君敢謂應隨車雲煙天氣蒸初合水墨山容畫不如  
我亦行春兼待澤四郊極目爲軒渠

石橋亭觀插秧歌

前人

密針剡剡青於莎縈回繡壤依層波東方初動肩相摩

背筩競帶並筐籬拔取還把泥塗搓恐或根葉栖蝸螺  
截尾棄置休更揆存者束比菜把多挑來人影何婆娑  
隔隴拋擲飛亂校行行徧插整不頗各有方位同星羅  
須臾露葉都凌波風前臺笠雨裏簑嚼如野鶴伏如駝  
農功托始毋蹉跎有時角勝還笑呵爲問阿誰七窠之  
外復九窠始信人力原同科插秧閩謂一柯蜀謂一窠  
插從奇數余嘗問農人云  
多者只能插到七不能到九茲詢之亦然昨宵霖雨新滂沱水田漠漠深盤  
渦計日便是三耘過良苗轉眼成嘉禾田家之景誠如  
何欲作秧馬慙長歌小橋水滿春風和坐聽布穀聲聲

南溪縣志

卷八

藝文詩

六十一

催喚出煙蘿

宿白雲寺詩

前人

僕馬倉皇且息鞭白雲召我作高眠深林螢火風過竹  
隔隴蛙聲水拍田話到三峩憑選佛借將一枕便遊仙  
夢回仍是紅塵路鴻爪南溪已七年

南廣雜詠二十四首

前人

紫錦囊書下玉都字如岫嶺未模糊愛從諸葛亭中坐

看搨真形五嶽圖

五嶽圖碑在武侯祠  
國朝邑令宋鑑立

古廟新修雉堞間石篁點綴倍幽閒且須遲上觀音閣

烈女祠中看假山烈女祠在縣署照壁東偏祀漢黃帛女余爲新修並栽竹累石遂爲一邑  
之勝地焉

山村土主有明神社鼓登堂記姓陳眞笑荒唐諸里老

浪傳古蕩取麒麟陳公廟在山村里碑載係土主其土人則稱在嘉靖間奉詔取麒麟云

李杜當時不到南殘山剩水欲何探嘉州別業晤軒字

留與騷人訪古談岑嘉州別業在龍騰山下黃山谷晤軒石刻在資聖院俱省志

茅册新登戶口盈桑麻雞犬接柴荆錢糧已免秋收足

相與歌呼頌太平南邑本年丁數册又川南本年一

丁赦地

南溪縣志

卷八

藝文詩

六二

靈風縹緲擁雲旗廟祀于公銅鼓湄底事猶留羅與李

竟亡直指兩章詩于公廟是明按察錢公過銅鼓舟覆見神救護因祀之並繫以詩羅李俱

當時佐貳附載在碑

瀛洲有閣峙江心近爲披沙浚漸深小廠方船都逐盡

丁甯切莫再淘金瀛洲閣爲南邑要區時有在此淘沙者余力嚴禁

望夫何自上高岡貞婦留形道路傷輸與石公同石母

一生對面白雲鄉貞婦石相傳是貞婦所化石公石母在白雲里

一肩攜就早登城倉斗何如市斗盈不慣喫來包谷餅

都緣米價甚公平量米穀曰攜市斗硬市比倉斗大有加京斗民斗曰攜市斗硬市比倉斗大有加

倍者有倍半者有兩倍者  
各處不同粒米曰包谷

秋來記是小春天纔過收成便力田胡豆芝麻種都就

預瀦冬水待明年川省以收成過爲小春  
其來歲田水謂之冬水

挑煤多半是生涯亦復傭工度歲華笑煞么兒無活路

倒騎牛背弄梅花川省呼最少者爲  
么活路工夫也

鳴聲軋軋響閨房篝火秋燈徹夜長織得加機誇細縷

逢人爭說似隆昌布以隆昌爲最南  
邑加機者倣之

紫茄白菜碧瓜條一把連都入市挑瞥見珊瑚紅一掛

擔頭新帶辣椒川省凡一起之類皆曰一把  
連菜擔則並帶紅椒出賣

南溪縣志

卷八

藝文詩

六三

壓領村間各鬪粧朱陳門戶說相當兒家斟酒雙雙對

不是平常並長娘女人以銀串掛脰名曰壓領娶  
親謂斟酒抱媳則謂之並長娘

綠窗粧罷望春晴倚閣停鍼繡未成忽聽雷聲齊掩鏡

怕他形影太分明俗傳女人聞雷則掩其  
鏡云恐有妖魅照過

擲博呼盧百戲饒賭雖酒食有明條如何相率攤錢去

又向屠門作估標屠戶懸剩肉於竿令眾猜之  
以定勝負名曰估標宜嚴禁

趕場百貨壓街檐北集南墟名號添且喜局錢通已遍

不須攜米掉煤鹽場期貿易曰趕場又前局錢未  
通雜物多以米換掉換土語也

正冲名與插冲殊厥冊無分只計區每爲勸農阡陌度

杏花樹下立須臾尺魚田鱗册名厥有册載段數不載分

馬蹄脚下盡居塵烟火相依夾道連忽聽市聲呼口岸

站房知在隔鄰邊飯在城內住者稱曰馬蹄脚下

掠波最數老鴉秋雨後鷺鷥平水流銅鼓九龍都過盡

趕船便直下瀘州俱老鴉秋小船名鷺鷥銅鼓九龍

文約書成定約先買驢博士笑盈篇就中那辨東西至

斜直惟憑上下弦契稱文約文約未立先書定約

長茅短劍更爭豪渤海何由比賣刀功令今銷黃鱸尾

等閒相戒莫輕操川省民多帶刀刀名不一嚴

南溪縣志

卷八

藝文詩

六四

葉子烟高說是魁輕盈裝出火為媒可憐遠道多香草

添得相思一寸灰本地多喫烟葉裝有一寸

背篋一路影橫斜婦女多情亦作家青帕裹頭誰屋裏

紅花採過又棉花女篋人以竹筐繫背後謂之

和高明府仙臨寺詩

邑人 稅惟學

支筇彳亍一登臨裊裊祥煙氣象森石面靈痕延玉蹟

碑陰壑臼識文心筇飄婀娜依裙色鶴唳淒清叶唄音

隱顯雲天誰認取野花榮落憶瑤簪

雲鬢何日此賁臨千載遺輝色象森月映芝莖疑鬢影

風敲竹幹誤鸞音白雲孤鎖留眞馭紅日雙呈鑑道心  
最是仙源名勝地到來幾欲解頭簪

和高明府普惠寺鐘聲詩

前人

古刹蒼涼度曉鐘誰司擊搏振飛龍晴開碧霧僧敲鉢  
露滴虬枝鶴唳松風淨落花眠石磴藤牽刺蔓繫遊蹤  
一聲清越甦塵夢大小乘禪問旨宗

梅溪感興詩

前人

遙傳香色徧溪隈此日徘徊半散材會向月明瞻影亂  
漫從雪際認花開一泓曲曲穿虹影兩岸青青繞綠苔

南溪縣志

卷八

藝文詩

六五

斷碣摩娑難核實幾回索笑浪疑猜

遊開仙洞兼贈如方

前人

仙蹤頻寄問延竝契心田幽邃儀三島嶽崑別一天月  
明虬幹古風過梵音喧翠竹書奇字靈巖洒淨泉雲深  
僧駐錫性定客參禪洞達歸宗教惟煩示一拳

遊開元寺詩

前人

曲徑通荒刹回臨天際遙門關音寂寂樹古影蕭蕭危  
閣撐霄漢飛蕙轟斗刁四時花獻媚一徑竹干霄僻地  
禪栖穩名山僧占饒幽懷適與洽小憩靜塵囂

南溪八景詩 錄 五景

邑人 何瑞圖

曲曲大江隈幽深一洞開寒煙迷雉堞細雨濕莓苔僧  
倚危樓坐藤纏石壁來紅塵飛不到祇此是蓬萊 海樓

煙雨

仙觀塵囂遠清幽別有天晴霞飛片片瑶草自芊芊地  
僻乾坤靜山深日月偏坐來忘俗慮心志覺超然 仙觀

晴霞

山靈頻現瑞况際夕陽斜彩射珠宮麗光瑩貝闕華躔  
林沉晚照峭壁散晴霞煙消江似洗明月吐平沙 龍騰

南溪縣志

卷八

藝文詩

六六

晚照

東望杳無際江心孤嶼橫霞飛沙燦白雨過水添清露  
氣蒸雲濕波光助月明灘聲頻送響夜夜到孤城 鎮瀾

夜月

寂寂蘆亭渡蒼茫煙景隆鳥啼青嶂外人住綠楊中翠  
竹栖寒色黃蘆送晚風夕陽沉返照蕭寺一聲鐘 蘆亭

晚渡

遊圓覺寺題壁詩

邑人 包學崧 樂山

蘭若瞻天際孤危一徑通橋平臨曲水亭短度斜風石

磴松陰落禪關竹影籠來參不二偈會上最高峯詩思  
僧敲外塵因蝶夢中惟餘無盡意留共壁霞紅

遊仙臨寺詩

前人

逃暑尋幽勝瓊宮絕巘培雲迷飛鳳閣月映降仙臺鳴  
珮隨風振香蘇逐雨來松濤清夏簟梵唄繞春雷佳氣  
溶溶合晴煙縷縷開仙凡真有界片晌足悠哉

賦桂溪得雨溪聲

前人

山雨夜縱橫山溪風浪生翻盆添澗漲出峽發灘聲雷  
送千峯急雲分兩岸平原疑逢左右腔不合琴箏爲藉

南溪縣志

卷八

藝文詩

六七

滂沱徧因之激盪成桃花衝水出更憶武陵行

半月池詩

邑人郭城

活水溶溶湧碧泉倒垂玉玦在江邊頻經三五難盈魄  
長對輝光祇上弦幾點浮萍風約半一泓水鑑荇相連  
人巧天工兼地勝中秋應作雨回圓

瀛洲閣詩

前人

徒聞海外有瀛洲此地稱名亦偶侔四面大江全抱寺  
千尋傑閣半臨流廉纖雨洗琅玕竹洒落人居縹緲樓  
莫謂仙凡眞箇隔桃花浪裏渡輕舟

頌崔明府德政詩

邑人 劉天祚

義倉自隋興歷久幾湮沒一自我侯來下車恒補闕簿  
書搜疾苦臨蒞勤賑發往者蓄三餘今者精校核胡爲  
子息權屯貯留濟竭狡隸無能吞稽查防奸猾備荒誠  
妙計視民無秦越惟有吏清廉居官慚入悖修建義倉  
遂生爲國本作苦賴田家旣著勞農典還勤勸相車臨  
溪烝士女把酒話桑麻易耨叮嚀語譁然到日斜桂溪  
賞農

奉

南溪縣志

卷八

藝文詩

六八

命䟽河道波濤頓坦平水流銅鼓靜浪捲石盤清舟筏行多

穩舳艫涉未驚賢良多德政頌入棹歌聲修銅鼓灘

送鄧恭菴之彭水任詩

前人

君不見蛟龍潛淵暗養鱗瞬息變化出風塵又不見梧  
桐高拔栖鳴鳳暫借一枝憩羽變天生英俊豈無因次  
第栽培福自申顧盼前途方未盡此日輝煌氣象新回  
首當年同學者依稀猶有聚螢人沽美酒話平生悲歌  
歧路欲沾巾

山居詩

僧三仁

芒鞋竹杖破袈裟信是湖山解脫家  
新雨洗開三徑路  
晚風吹送一庭花  
蒲團坐月萬緣淨  
石屋停雲午夢賒  
紫蕨綠芹炊不盡  
這般清福許誰誇

山居無事獨盤桓  
大歇場中處處安  
滿地葛根堪續衲  
盈坡蕨笋聽時餐  
夢回雨過松濤淨  
定起月來心地寬  
門鎖煙霞人到少  
閒移芍藥傍闌干

曉起苔階刻漏稀  
滿山堆積翠微微  
門前煙柳教春住  
隄上彩虹駕日飛  
雲出無心常自在  
泉流如意得真機  
黃鶯也解超空界  
撇去一聲過竹扉

南溪縣志

卷八

藝文詩

六九

住梅溪橋鐵峯山圓覺寺詩

前僧

三椽締纈數峯西  
翠竹蒼松護石蹊  
雲色簷前看鐵嶺  
風光門外有海溪  
懸巖古澗奔濤近  
峭壁新蘿牽月低  
了了心中無一物  
山花深處鳥飛啼

南溪樂府

并序

邑拔貢生

羅維靜

似山

流覽縣志卓然者廣爲樂府依時代編次俗士賤近而貴遠庸流棄常而務奇維桑與梓大有入焉事本表微義兼風世元微之云非有爲而爲則文不妄作其庶幾焉

柰公何

爲漢烈婦黃帛也

波淼淼郎小歸妾非山阿竹何用孤生爲郎氣絕矣妾

膽裂矣妾命畢矣郎屍出矣烈婦黃帛其夫張貞師事

韓子方抱屍積名鷺鷥縣西七里投水碕名鴛鴦縣西三十里常

璩特筆何煌煌棘道之人薦馨香督郵界石衣袂攘是

南是宜勿苦分君不見西郊五里黃帛墳

題名坊為明劉忠信景寅景宇也

萬安當國忠不立其朝以戶部告歸逆瑾當國寅不受其招

官戶部員外郎忤瑾勒為民堂堂繡衣公景宇官侍御英氣特立鶚朝薦

王伯安晚師范孟博眼底何知有桂萼風骨稜稜並清

峻殺身成仁讓劉信信官嶺西參政吁嗟乎大峽溝石

南溪縣志

卷八

藝文詩

七十

子岡四進士碣屹相望士氣於今久不揚請爾來讀劉

家題名坊坊建邑中街鑄繡衣繼美四字

立孤行為明楊節婦作也

嗚呼程嬰不可見杵臼亦大難何況撫孤三世一髮引

千鈞有婦氏楊為談來立妻煖床未及月魂斷青陵臺

妾身分明可以拜翁姑妾年十八膝下無一雛宜去宜

留宜地下從夫妾胸有成竹夫知也無嗚呼天意難測

不慙遺一老促迫入鬼域遺孤二歲妾之小叔夫之弟

保抱攜持叔乃婚配叔有子兄有嗣冰霜太無情凋此

蘭與蕙春去花留荳蔻胎山移草挫薜蘿志姒去新夫  
憐姒留談祀延願將留姒心剖與姒氏看留珠鬻櫝姒  
去不復姪又徂謝姪婦嫁一子世杰生遺腹娶余氏生  
三子門祚存鬼不餒七十年節婦死節婦身死神不死  
一柱砥狂瀾倒回山峽水噫吁嘻張世傑陸秀夫一君  
亡一君扶秀夫負昷赴海死世傑仰天焚香發長吁趙  
氏無兒臣何敢自愛趙氏有兒臣未敢捐軀節婦之節  
正如此立孤難死易耳不然偷生浮世間奸臣亂賊皆  
可覲黃冠

南溪縣志

卷八

藝文詩

七一

戴吾頭

爲侯將軍也

侯良柱明之故總兵子曰天錫孫拱極啟勝及采猶子  
名傳家不讀十三經長戈大戟搖風霆天啟崇禎四海  
沸騰巴蜀大盜起此何時也臣能爭眼見高皇帝之天

下四分五裂前有奢酋後李賊

天啟元年永寧蠻宣撫奢崇明水西蠻安邦彥

叛初從朱燮元

崇禎二年巡撫朱燮元率大軍討賊

擊賊於永甯斬崇明

邦彥蕩滌萑苻清再從洪承疇

八年奉總督洪承疇令扼賊入川

鳳縣

三江口三百七十級生挈流賊首崇禎十年賊黨犯南

江通江帝切責良柱巡撫王維章良柱守廣元勒兵爲

分防賊首李自成分一軍作三路兵由梨樹口麥坪攻  
廣元良柱拒戰綿州城壞雲壓天天失晶將軍頭顱飛  
賊營萬人白骨填溝坑維章守保甯坐視難救援天子  
赫斯怒詔奪良柱宮孤臣身首合不得何取袞衣繡裳  
進賢冠家人尋歸續以檀招魂葬之觀音灘縣北五里殺

身削職臣不恨可惜賊兵猖獗長驅直逼成都垣其子

天錫伏闕言臣與賊不共戴天捐此七尺身誓雪君父

恥克復郁鄢戍敗走馮雙禮順治二年故明臣王應熊  
一衛起甘良臣爲都統

以天錫副之一孫一姪走荆湘不死於兵死於水崇禎十一年  
啟勝一拱

南溪縣志

卷八

藝文詩

七十二

極合兵湖廣沒於水

我聞僕固懷恩一門死王事者四十有六人

良柱與之相等倫三世爲將道家忌此語未信龍門真

天運適丁厄陽九肯容祖孫父子圖麒麟嗚呼隻手無

由障東海八十三年槁死老侯采采官遊擊順治九年卒

貞元殉爲邑令明王公碩輔國朝趙公家駿也

有城可守則後死無城可守則先死視死如歸堅不移

兩公忠義何淋漓王令字斗瞻畢節明經師崇明攻城

十五日城陷一家爲伏屍自乃以刀環頸頤賊旣入城

支解之吳三桂犯順趙公家駿來尹茲忻州進士城無垣墉

惟藩籬書生不習袴褶衣袖手不可去非宜以身從繩

蠶縛絲其時十一年康熙王令贈官兼奉祠贈尙寶卿祀入忠義

祠趙令遺事失莫考漢壽廟額是公親筆題文四字尙存

大氣蟠屈筋骨垂似有毅魄含睢盱墨光黝然君子遺

後來見者如何思

虎磨牙爲國朝何瑞圖也

昔有老明經姓名瑞圖講學而秉禮和氣春風俱記  
得康熙十七年四郊戎馬生狼烟官棄印民逃命瑞圖  
有父老且病父飲藥兒侍闈父食粥兒託鉢問兒飢不

南溪縣志

卷八

藝文詩

七三

飢兒有野蔬可自活虎忽來瞰我戶瑞圖涕泣向虎語  
可憐虎亦磨牙去兄龍圖陷於虎瑞圖曰我肉甘兄肉  
苦虎食我兄不如食我虎搖其喉猶不肯吐虎食人肉  
但擇肥與瘦不識人中有長幼賊推瑞圖墮水龍圖竟死終身恨之云虎

今啞我兄虎昔全我父誰信八十廣文兩捋猛虎鬚狎

虎能令虎變鼠瑞圖終鄉縣訓導

十三郎爲國朝雷孝子也

乾隆年歲辛巳李庄驛回祿起火鷓火鴿盤天飛中有  
姓雷父子相枕死父臥病兒負之兒力難勝父體肥嗚

呼父體何曾肥負者乃是一十三歲兒初入毛髮燎再  
入皮膚焦三入四入骨盡出抱父不知是何物嗚呼節  
不褒孝不旌閭里之人無所型令長爾爲誰虛蒙父母  
聲激何濁揚何清

夜氣篇

子輿言存心貴養平日氣利與善之間舜蹠由此異五  
更一點雞初鳴太白光射啟明星東鄰惱屠伯眉睫橫  
殺機右手握屠刀睨豬豬不知刀刺湯燻毛落如霰剗  
肝剔腦血肉猶顫老饕平日時似憐豬痛哭怪爾晨炊  
買肉膏舌脣不問是否此豬肉

南溪縣志

卷八

藝文詩

七四

南溪新樂府

爲邑令翁明府作

邑訓導

左紉蘭

秋田

寒士金

寒士飢寒士哀寒士不肯受嗟來萬鍾千駟一介取生  
平志氣何有哉傲骨峻峻家益落獨立蒼茫無處著自  
許高歌動鬼神不愁餓死填溝壑風雪天寒歲欲除明  
府叩門行苞苴白粲五斗千青蚨物則不多心有餘公  
曰士者民之模爾飢爾寒如切膚不然承筐是將胡爲  
乎吁嗟乎千金笑百壺酒華屋膏粱何不有豆羹簞食

微乎微寒士之寒周者誰

貧兒粥

霜風料峭公門開貧兒蜩縮跣來大者十二三齡小  
者孩一人項下懸一牌鶉衣百結皺兩顛九里引之倉  
房隈依篷向煖勻安排或鉢或盂盛粥糜噉聲嚶嚶充  
晨飢十月始二月止五百餘人濫竽似喁喁飽煖春和  
美庶免倒填溝壑裏吁嗟乎孺子爾何知爾皆南溪縣  
民貧家兒使君活爾夫何爲願爾長成人爲農爲商爲  
賈爲工師毋爲豺虎毋梟鴟慎毋忘仁慈負茲良有司

君不見酷吏視民如雞狗於爾貧民復何有

孝子坊

禧禧出出火鬱攸赤燦怒赫西南流地爲焦爛天爲愁  
粵乾隆辛巳李庄雷氏子蹈火救父而火死死時年甫  
十三齡迄今七十六年寒暑更綽楔未荷

天家榮道光十六年太歲曰丙申明府上其事建坊彰孝  
行大書特書留姓名千人萬人哀感并幽光燭天天日  
晶公曰嘻爾編氓人生忠孝本至性能全其性唯精誠  
爾不孝加爾刑爾能孝予爾旌無分士與庶毋間死與

生千秋萬代猶典型守土之責責匪輕吁嗟乎風世勵  
俗心肫肫今之從政如其仁

將軍石

觀音灘侯家瑩紫苔斑駁穹碑生左書孫名國維曾拱  
極右書戊寅之年冠崇禎中書榮祿大夫秩都督同知  
官大明勲階赫奕示諸掌父子何獨無其名載讀南溪  
志夷考將軍事崇明戰績高綿州將星墜正月六日天  
鼓鳴雲裏衝車戰血腥江上旌旗痛父老獄中貫索悲  
中丞將軍雖死神不敝死後殺賊能爲厲沙場喪首不

南溪縣志

卷八

藝文詩

七六

喪身續檀下見高皇帝祇今墓道松楸古年年寒食花  
爭舞英名未勒忠骨香舊是明家乾淨土幾葉雲初易  
暮田陵谷依稀二百年不逢賢宰勵忠節豐碑名姓誰  
重鐫吁嗟乎將軍葬時寇如林碑不鐫名有戒心君不  
見唐世宦官魚朝恩快仇陰掘令公墳

張姑行

張氏姑聘於李年十八依母氏御輪有日夫先死初聞  
黯黯悲不已繼則靡他之死矢從孀偕行省親串驀入  
夫門哭流涕孀牽裾問所以姑云生爲李氏人死爲李

氏鬼從一而終以義止願事舅姑終守此朝勤辟纊夜  
絲枲茹苦含辛七年矣彼蒼有意困奇節夫黨母黨貧  
如洗寄塘先生古君子分廉月給官倉米並給官錢佐  
薪水姑不言恩安命否吁嗟乎張姑行皎如日張姑心  
堅如漆自今以往貞於一琴山峩峩鬱以紆福溪之水  
清且腴巋然靈光鍾扶輿君不見西郭巍巍黃帛坎千  
載聞風尙興感

校士館

赫奕章灼臨康莊丹碧朱綠輝兩旁上署楚南太守書

煌煌開廣裕路顏厥坊高閎大厦壯無匹有堂有軒有  
庖溷綺䟽藻井相新鮮櫺櫺欂栳結構密森森佳植蔭  
南榮桂李桃槐桐梓漆層層門洞開仡仡垣墉新雞鳴  
升堂堂鼓振當門序黠官垂紳入者魚貫來侁侁吮毫  
舒紙何溫文衣冠列坐風日煖鱗次無煩慮人滿南溪  
置縣二千年今日乃營校士館君不見去歲縣試儒童  
坐縣庭天道半雜風雨晴晴天文戰欲摩壘風雨何以  
鬪心兵幸哉有此靜深宏敞數十楹手揮雞毛筆耳聽  
春蠶聲敢問勗者繄何人公曰嗟無譁汝往哉此是小

龍門我亦昔年辛苦來

黃烈女祠

邑尉 高 願 樗仙

東越曹娥江南溪黃帛坎彼矢求父心此瀝殉夫膽五

日十四日至性出勇敢父天夫所天死矣視猶欲今茲

薦馨香當年魂黯慘清風各千秋祠下起觀感

寄塘先生於隆冬煮粥賑幼孩是乃仁術也願既助經

費並頌以詩

前 人

保赤無奇術惟求心所安不教轉溝壑且使免飢寒鶴

俸年年減鳩形箇箇歡為推慈幼意博濟本來難

南溪縣志

卷八

藝文詩

七八

和高樗仙少府見贈作

翁紹海

余於冬臘正三月設粥廠者五年今春將乞假去恒以經費不繼為慮樗仙慨然捐費永為設廠資並作詩見贈漢昭烈云勿以小善而不為隆冬賑粥二首私惠耳然得尺得寸亦眼前功德也喜甚次元韻二首

幼幼得同志心於去後安誠知一命士能庇萬家寒養

謝門關稅人爭鼓腹歡脂膏不自潤子惠近今難

天罇從此朗莫笑一隅安好借雙弓熱全銷三月寒呱

呱誰引泣粥粥有餘歡貽穀惟君子何愁日大難

戊戌夏錄近作

前 人

六月二十四日小集烈女祠為蓮花作生日同人分體作詩予畏熱日不耐搜索錄示近作一首亦前後抵

銷法也  
一笑

四月農田苦車水縣官禱雨汗如洗水車聲作變徵聲  
聲聲響入心坎裏六月打稻聲蓬蓬其音直中黃鐘宮

縣官怕手大笑樂戊戌幸不逢年凶乾隆戊戌川東大旱道殣相望今春

偶缺雨民鑿於前車遂閉糴不糴糧價驟昂嗚呼縣官前後一人耳宮聲徵

聲有奇理不見漢家聞樂中山王心悲則悲喜則喜最  
喜歲美民氣和此功貪天天不呵飽飲捫腹行皤皤啼  
飢忽念鄰家苦馬雷邊事將如何

校士七絕四首 邑令 黃懋祺

南溪縣志

卷八

藝文詩

七九

拔十由來得五難論文總要此心安不知還有遺珠否  
再向驪龍頷下探

枯株敗卉已成灰何事身從朽壤來試看夙根清淨地  
萬花吐艷一齊開

鬢門雋秀已馳名科第三頭更寵榮鳳閣鸞臺吾輩事  
莫輕今日一書生

此中情況我深知六度槐黃觸舊思燭盡更殘人倦後  
敢忘矮屋苦吟時

又二首

五年三度此間來排日論文拔雋才忘我書生眞面目  
不禁展卷笑顏開

蘭臺芸署盡神仙一落風塵便惘然只爲折腰難強項  
麤官衣鉢不堪傳

賓興之日得七律二首書以送行爲諸生預賀也

邑令 江懷廷 蘭臯

回首瓊林十載強近因遊宦硯田荒繡鴛未識新花樣  
盤馬猶思舊戰場一吏風塵空磊落諸生雲路任騰驤  
嫦娥若見應相問爲道簿書終日忙

南溪縣志

卷八

藝文詩

八十

坐對琴山早放衙堂前問字集侯芭尙流闕濟孤桐韻  
好種潘安滿縣花士有奇才應報

國文無定格要成家今朝指點瀛洲路穩送秋風海上楂

遇賊行

歲貢生 陳春恬

赤幘紅衣面如鐵陰風慘怛旌旗掣逢人面縛比牽羊  
昔我罹羅今咋舌咸豐庚申序秋九豕突熨道來羣醜  
爺娘妻子各西東嗟哉團練此何有賊去旋來誰復料  
眾恐傳訛尙相笑須臾烏眾四山紛欲避不及驚鷹鷂  
弟兄潛聚泣依依趁晚商量月下飛無可柰何兄力疾

路影迷茫是若非月下飛時兄力慢天邊常恐雁行斷  
椎心頓足勉弟行促行不行過夜半是吾兄也是吾師  
臨難何能竟舍之中夜徬徨無別計拚將殘喘付梟鴟  
天雞唱曉人忙起馬鳴蕭蕭賊至矣披髮仗劍捉人來  
逼使相從去如駛吁嗟乎讀聖賢書列膠庠士無權空  
愛孫武謀罵賊難同杲卿死忍氣吞聲前致詞我是草  
茅寒賤子未習師旅和弓矢何能擊鼓揚旗振軍威披  
堅執銳馳驟駢惟時首肯悄無聲詎知轉盼屬吾兄病  
虎支持骨猶大白面微鬚齒似輕叱咤猙獠刀劍舉倉

皇逼共雁南征已焉哉事至斯情何急身擬替兄行淚  
忍向兄泣匆匆直吐肺腑言兄年六十我五十兄病我  
無恙兄老役難給以我代兄行免我兄維繫臨歧弗私  
語恐賊心猶豫慷慨出柴扉俯心煎百慮前鋒行斷後  
鋒來程途催促何急哉行行數里獲天佑鳥脫樊籠翅  
展開紆途百曲踵門至兄弟重依湯藥侍妻孥圍聚共  
咨嗟大小重添數行淚共言小僕年十六刀環也解金  
錢卜卜罷候門望主人獨訝君歸何太速家人喜懼同  
相議莫蹈前車早行避驚鴉返樹魂始蘇怖鴿入林心

猶悸無心偶舉話良友持贈聯篇意何厚敬述寥寥一首歌聊與諸君共覆瓿

割臂行

邑增生

温以忱□忠

古有截耳婦但聞以節稱古有斷臂人不聞以孝傳節孝兼全自古難我聞割臂至再三孝慈苦節一肩擔我今爲作割臂行好教風示後來人一解 女姓趙氏小字

春蓮亭亭□立儀靜體閑幼不識詩書愛聽劉向列女傳班昭女誠篇二解 長適巨富家安樸素屏鉛華不逮

事翁姑上有祖父母善體老人心羹湯必親手或曰女

南溪縣志

卷八

藝文詩

八二

家富且有胡弗使竈婢與厨孃女曰否否三解 其夫幼

孤既單且弱骨肉無端相斲削婉婉調和爲家之祥不爲家之索四解 無何祖母病醫技窮藥不應家人惶恐

女心有定古有割肝割股人可以爲親延壽命焚香告彼蒼刀光相掩映一割血淋漓煎湯和藥進沉疴脫然

失天心默默印五解 祖父病篤復如此一割再割創深矣祖病良已夫病危三割救夫夫不起六解 夫不起女

心枯欲以身殉其如膝下有遺孤勉強撐持鎮日長吁

七解 遭家不造女心憂傷二女焚死女病膏肓垂危易

服羅衣重叠裹金創刀痕歷歷在欲蓋彌彰八解死而

復蘇乃告阿娘冥司有言兒應早亡以三割苦延八算

長言訖而逝眾聽確確非荒唐九解由來至性格昊蒼

女身雖死而未死留得凜凜烈烈之氣凌星霜十解發

潛德闡幽光彤管有煒筆花香好將姓氏達

大閭貯看

九陞錫金章旌典煌煌端不讓懷清崇嘏揚其芳

貞女篇

為李張劉黃陳包  
姑李馮姑廖張姑作

前人

東漢出烈女里名黃帛坎事蹟載志乘祠宇光祀典巍

南溪縣志

卷八

藝文詩

八三

然烈女墳星霜幾更換摩挲舊碑碣行人過而歎遥遥

貞烈風歷劫不銷散留茲清淑氣鍾毓復不淺後來生

其間一一相濡染其一李張姑已得邀旌表守貞五十

年艱苦歷多少至今兩鬢霜大節全完了雲坊高矗矗

恩綸新翰藻繼起黃貞女崇嘏遺芬早復有包貞女孝肅宗風

好更有廖張姑清如蘭在沼復有李馮姑靜若幽谷草

都近黃帛居年皆十六七生長詩書家已許朱陳匹天

桃賦有期將圓月忽缺變服詣夫家哭抱孀嫜膝長願

奉晨昏永矢靡他節螺贏能撫孤螟蛉可繼絕翁姑聞

女言不禁感而泣妯娌聞女言不禁憐而恤姊姒聞女  
言不禁碗而惜旣無伉儷恩胡爲不改適旣無同夢情  
何以願同穴視彼守節婦芳徽尤烈烈兩兩女貞木一  
一鳴清潔皎皎顏如花凜凜心似鐵後先相輝映冰壺  
殊朗澈迄今望西郊秀靈猶不滅

鴛鴦圻

邑增貢 包本芳 立蓀

鴛鴦圻上陰雲裂鴛鴦圻下浪西泊鴛鴦生死不相離  
漢家烈女傳黃帛投江不滅曹娥孝殉夫直奪英皇節  
一十四日天地迴遺骸突出鴛鴦磧先雄挽手面如生

南溪縣志

卷八

藝文詩

八四

瓊真抱尸心共烈吁嗟乎刃可蹈兮志不可奪鐵可磨  
兮氣不可折千載英靈照漢家熱血如潮噴江碧君不  
見黃帛坎前鴛鴦墳生不同居死同穴

葉烈女行

前人

百丈鐵尙可折萬仞雪猶可巉惟有視死如歸一寸心  
錚錚皎皎不可滅君不見南溪葉姑抗全節葉姑之節  
亦何烈姑父名重芳姑孝聞於鄉姑字陶友仁友仁少  
孤貧十載客於外愆期未御輪咸豐十年冬十月十五  
日壞雲壓城摧鼓聲賊突入室女被執賊曰從不從姑

曰殺便殺生來血性不泯沒此身甘浴刀頭血賊閉諸  
室旋自刎賊驚相戒母擾境姑以殉節鄉獲全凜凜生  
氣今猶傳嗚呼爵未受賊可降愧死鬚眉氣揚揚千秋  
而後此綱常葉姑之烈誰頡頏

女貞樹

爲邑貞女陳包姑作

前人

女貞樹女貞樹上黃鵠悲女貞樹下黃帛墓黃帛千秋  
靈未已貞女包姑生故里包姑幼字陳朝銘朝銘遽天  
姑未婚嗚呼姑能代夫養慈烏撫姪延祀孤不孤廿年  
辛苦無人如此心此志終不渝江令聞之旌其閭璞玉

南溪縣志

卷八

藝文詩

八五

葆貞煌煌書吁嗟乎褚淵王儉爾何人堂堂立朝徒負  
恩兩代豐碑立何處惜哉未見女貞樹

宿明侍御闕可山故里小山草堂

前人

古月生叢桂小山開草堂芝蘭新子弟門第舊冠裳駿  
烈傳三傑鴻篇貯一囊異香棲隱處雲氣鬱蒼蒼  
一雨百花放渾然天地春林泉無俗韻魚鳥亦親人金  
粟留仙影木犀參淨因夜闌更相對吟詠幾精神

壽谷

明侯太保故里波羅池

前人

曲徑入盤谷三峯天外青陰岩森鬼斧殘溜散珠星窟

險蛟龍伏山深虎豹腥閒來琴一操萬壑響泠泠

仙臨寺梅花

前人

暗香多近水清韻不因人淡月留疎影孤山放早春幾  
生空色相數點亦精神萼綠華臨玩仙風盪俗塵

南廣夜泊

前人

亂砧敲客夢新月霽寒江霜氣四山肅風聲萬木降遠  
懷星耿耿離緒水淙淙見說桃源近侵晨覓釣缸

桂溪禪院

前人

一犬吠寒竹數峯青到門溪烟肥碧靄山月瘦黃昏石

南溪縣志

卷八

藝文詩

八六

涸蓮餘子霜乾稻有孫留人叢桂裏還悟木犀源

明侯將軍故里

前人

將軍老屋橫虛壠數點寒鴉繞墓田亂世功名爭殉節  
一家骨肉壯凌烟殘棋敗局原難挽曠代英風尙凜然  
鱗甲滿空誰白戰波羅池上雪橫天

武侯祠

前人

漢闕荒涼紫氣沈靈旂暮雨樹陰森風雲陣合龍猶臥  
祠宇春深鳥自吟西蜀挽回先帝業南陽瘁盡老臣心  
大江東去經銅鼓付與灘聲憤古今

晚泊瀛洲閣

前人

晚天沙嶼泊扁舟萬頃澄波淡不流鸞鶴夢酣三島月  
魚龍吟破五更秋江城倒影浮前浦星斗聯珠聚上頭  
憶否廣寒宮裏事紫雲一曲落瀛洲

白雲寺梅花

前人

暗香清處畏人知竹外和烟畫一枝古渡間雲渾入定  
綺窻明月費相思笑回春暖何人索守到天寒有鶴痴  
不入離騷自高格芷蘭相待幾多時

貞烈歌

爲烈女黃帛貞女李李張姑劉黃  
陳包姑廖張姑李馮姑作

南溪縣志

卷八

藝文詩

八七

邑歲貢生 黃炳章 虎臣

天地有正氣不擇人而鍾鍾於男爲豪傑鍾於女爲貞  
烈豪傑容易貞烈難烈者自矢貞者完君不見桑垂西  
郊四五里坎名黃帛漢烈女其夫張貞沒於水爲覓夫  
骸甘一死投江十四日竟獲抱夫起建坊自昔時古祠  
深仰止迄今二千年又見張姑賢不意一石工有女如  
此豎黃姑生名族節自詩書出講究多儒家包姑張姑  
亦不俗馮姑雖貧僅啜菽十載養親同破屋不遠不近  
地相連西方長此貞石鐫我爲黃帛更生羨清操至性

無負所天貞女在後烈女在先烈女能使貞女感後先  
同揆都皎然猶憶咸豐九年間逆匪犯境猖獗無前獨  
向西關不敢近如聞軍聲人萬千月餘賊夜遁四境息  
烽煙始知貞女處早有神靈護驅賊不須兵只賴貞操  
著嗚呼千勁卒不如五貞女此後莫將強弱比正氣所  
鍾惟天地倚願我輩起忠孝心從茲不已

丙寅季秋乙垣運副邀集寮友烈女祠玩菊以采菊東  
籬下悠然見南山拈韻賦詩予得采菊二字遂成七

絕二首

胡元翔

伯槐

盛友如雲齊角采舉觴若箇能吞海爲寫冰骨與霜姿  
名花奇節千年在

雅集靈祠賞芳菊玉屑金臺光簇簇寒花獨抱晚節香  
不讓山頭女貞木

前詩意有未盡續成八首

小亭卜築舊城東匹練橫江望眼中點綴疎籬高復下  
故栽芳菊殿秋風

處士花栽短短籬不爭春艷故開遲寒葩香共貞魂遠  
綽楔名標漢女祠

同人雅集修篁下射履藏鈎儘瀟灑有時把酒更狂吟  
壁上揮毫任我寫

韶華似水共悠悠不覺光陰到晚秋笑我詩懷如菊淡  
依籬應許作同儔

憑眺江樓思渺然名流相聚亦前緣黃花似解迎人笑  
秋色還同春色妍

羣英高會喜相見陶令樽開賞菊宴留得秋芳好護持  
河陽自昔稱花縣

評棋賭韻小牕南喜見晴天擘蔚藍竹院有僧談佛法

南溪縣志

卷八

藝文詩

八九

禪心水月靜中參

芳祠嘉會勝龍山文酒笙歌樂且閒直到夜深歸去好  
滿頭都帶菊花還

福子彝司馬宴集寮友烈女祠唐海琴明經有詩見示

次韻奉酬

前人

高會羣英集煩襟俗慮刪客情同逝水詩意託遙山燈  
火看明滅漁舟任往還飛觴曾醉月身擬在仙寰

秋江涵素月瀛閣鎮中央匹練橫天遠鐘聲雜漏長芳  
亭餘古木勝地感他鄉忽憶叢祠裏聯吟正納涼

丁卯夏夜

亭上納涼與乙  
垣運副聯句

盛筵開北海好友共銜杯觴政急於火雄譚聲似雷鷓  
巢棲玉樹鳧鳥仰仙才到處留清譽潘花次第栽  
綽楔標千古名題烈女黃蘋筐昭祀事椒酒薦烝嘗貞  
魄能填海葵心總向陽因緣留翰墨不負好秋光

春日偕友登瀛洲閣

唐毓彤 海琴

招朋攬勝步瀛洲小艇飄然去不留萬疊晴山環曲岸  
一條砥柱峙中流碧桃無語開樓角黃鳥多情喚渡頭

興廢卅年緣底事斜陽滿日恨悠悠 斯閣  
翁君  
歲久  
於前  
失令  
修尹  
行

南溪縣志

卷八

藝文詩

九十

將就  
圯矣

甲戌之秋七月望前一日福子彝大令招飲烈女祠觀  
孟蘭會放河燈口占四律以誌一時之勝

蠟得黃門屐俗緣到此刪夕陽紅上塔秋水白浮山倦  
鳥爭巢急孤舟載月還幽情多領取忘却塵寰  
小亭環雉堞宛在水中央放眼乾坤窄舒懷歲月長鱸  
魚思故國鴻爪滯他鄉日暮看山色松風發晚涼  
使君眞愛客招飲共啣杯拇戰觴飛月談鋒語動雷江  
山容我輩撫字屬通才政簡無多事潘花滿縣栽

漢代叢祠古名傳烈女黃一朝明大義千載享烝嘗翠  
竹標清節冰心耀太陽河燈坊下過貞魄倍生光

雙節婦詩

爲節孝高臧氏趙氏庠  
生高瑞芝瑞萱之母作

邑增  
貢生

包汝雲

晴峰

嗚呼鍾母之法郝母禮西晉昭昭賢娣姒今千餘年誰  
繼起坤維正氣鍾吾里吾里有節婦氏臧歸于高翁舉  
孝廉夫食餼一時文望何清超未幾夫赴玉樓去臧欲  
從之殉之死其姒趙氏慰且止願輸己子延兄祀上堂  
問起居下厨潔滌滄春聲甫罷機聲起血絲縷縷針十  
指相助丸熊勤課子無何趙姒夫亦亡殯殮如禮神獨

南溪縣志

卷八

藝文詩

九一

傷繼姑老且病出入相扶將姑恩有餘慶二子列膠庠  
同治初年旌於鄉綽楔峩峩書琳瑯噫嘻四十年間攢  
刃心書香一髮承千鈞桂有子兮蘭有孫青衣江上人  
懷清白蓮並蒂香氤氳

舟泊銅鼓灘

前人

老鸛驚寒知漏信大魚吹枕作潮聲于公祠下鐘初動  
獵獵旌旂白露橫

半月池

前人

蟬磬一聲寒日墮半池山月夜昏黃游魚不上鷓鴣立

風露滿身蓮稻香

蘆亭晚渡

前人

一聲款乃驚霞散  
雙槳扶搖帶月揮  
笑指吾廬烟樹外  
青山斷處露柴扉